

東
華
續
錄

東華續錄

同治四十五

臣王先謙敬

臣張式恭恭校

夏四月乙丑朔諭軍機大臣等恩麟奏甘省西路賊氛日熾請飛催官兵進剿一摺肅州回匪與官兵互相焚殺回匪盡撲州城周圍屯紮復勾通獵戶將嘉峪關占踞甘州撫彝廳屬黃家灣回匪亦於三月初一日糾眾焚殺各鄉回民均有蠢動之信賊勢甚爲猖獗嘉峪關爲赴新疆進兵要路見被逆匪占踞關內外已梗塞不通肅州匪已登城官兵勢難持久甘州回黨煽動又成累卵之危亟須厚集援兵疏通關路著陶茂林酌度軍情移緩就急馳赴肅州會合黎獻之軍先解城圍仍分兵兼顧甘州與恩麟所派甘標官兵赴黃沙灣河一帶偵巡堵剿都興阿穆圖善當激勵兵勇

迅將甯夏漢城攻拔即可騰出兵力交穆圖善統帶由甘肅節節進剿並著雷正綰懷遵前旨將黑城子一帶踞逆迅行殄除進規靈州與都興阿等聯絡聲勢穩慎進取駱秉章所派援甘之鶴齡一軍曾否出關見在何處著駱秉章飛催趙赴甘郡肅州一帶扼要截擊並著都興阿等迅提前進楊岳斌勇隊前據奏報陸續起程此時甘省軍情萬分危迫著楊岳斌迅催全軍馳赴甘省其蔣凝學一軍並著飛催赴援肅州一帶仍分軍兼顧西甯毋稍延緩前經諭令成祿總統聯捷諸軍由陝甘前進著聯捷探明該提督見在行抵何處飛速知照進援聯捷接奉此旨卽統帶官兵星速西行會同甘省諸軍將肅州甘郡回逆次第掃蕩卽行規復嘉峪關該關爲通新疆要路必須迅圖攻拔關內外文報始通德祥一軍已赴哈密如有別路可通消息卽飭德祥之軍與關內官兵會

期裏外夾擊收復要隘並著都興阿等會籌妥辦階州匪勢已蹙
著駱秉章劉蓉檄飭川陝各軍迅克堅城殲除醜類即可選派將
弁統得勝之師移赴甘郡協剿恩麟於嘉峪關被匪占踞事前毫
無布置殊屬有負委任仍著檄飭所派官兵嚴密堵剿並激勵肅
州各鄉民勇奮力救援以解該城之圍並將甘郡回眾妥爲彈壓
撫輯毋任復行滋事其撫彝高臺廳縣並著飭該地方文武就見
有兵團妥籌防禦儻再有疏虞必惟恩麟是問懷之潰之將此由
六百里加緊諭知都興阿穆圖善雷正綰駱秉章楊岳斌劉蓉成
祿聯捷並傳諭陶茂林恩麟知之○丙寅僧格林沁國瑞奏捻逆
剽急靡常三月初十日我軍追至曲阜縣西北該逆直前抗拒臣
等督飭馬步衝擊擒斬多名匪勢不支卽向北竄臣等以逆眾旣
向北趨追剿更難鬆勁一面飭藩司丁寶楨帶領隊伍馳赴泰安

一帶扼要嚴防一面仍督官軍向北躡追十三日追至汶河該逆已於十二日偷渡遂飭總兵陳國瑞郭寶昌等帶領步隊先行渡河賊匪前股業已竄過鹽河後股之賊因官軍追至聞風亂竄淹斃賊匪數百名餘匪卽在河北游弋十五日我軍渡河追剿該逆又向東南奔至岡上屯回竄汶河以南仍由甯陽曲阜鄒滕嶧各境漸向南趨遂飭總兵張曜宋慶移紮永城夏邑以便迎頭截剿並調藩司英翰總兵詹啟綸移紮徐州探蹤迎擊仍親督馬步馳追該逆悉由臺莊渡運旋向蘭山郯城各境東竄二十五日追至嶺榆查探賊蹤已由青口南竄遁出東境查該逆旣由青口向南仍應督軍追剿以防回竄並飭丁寶楨移紮嶧縣防守惟青口距清江匪遙已飛咨漕運督臣嚴飭在防各軍探蹤迎剿並恐該逆被偪西遁圖渡運河已調英翰詹啟綸由徐州進兵俾前截後追

以收夾攻之效見在餘匪雖屬無多皆係悍黨乘馬狂奔日趨百餘里我軍緊追已有不及之勢若欲繞出賊前必須日行二百餘里馬力實有未逮而堵禦之兵無多又恐爲賊所乘卽如湯聘珍之在信陽范正坦之在兗州丁寶楨之在甯陽俱因賊眾我寡接仗失利逆眾前向北竄當因北有黃河之險足遏賊蹤是以督軍追剿不使停畱今賊既南趨官軍奔馳半月之久不無疲乏擬緩程前進以息兵馬之力南路見已有兵堵剿臣等惟有合力進取早蕩寇氛 上諭軍機大臣等匪眾遁出東境僧格林沁追至贛榆縣地方馬力已乏自應稍爲休歇且由此而南地多水田馬隊亦未能馳騁不可再令冒險前進與賊相持僧格林沁務當穩慎進取先令步隊追賊而以馬隊從平曠地方截其回竄方爲妥善江南派往淮陽之張樹珊吳毓芬兩軍並歐陽利見所帶礮船及

疊諭派防江北之兵著曾國藩李鴻章飭令速赴江北並嚴飭黃翼升礮船星夜前赴裏下河一帶不准片刻遲延吳棠彭玉麟仍當相機調度嚴密扼守不可稍涉疏懈駐紮永城徐州之張曜詹啟綸等軍著僧格林沁飭令探蹤迎剿並飭令劉銘傳懷遵前旨由蕭碭一帶往東迎擊兼防賊匪回向西竄之路其雉河集及歸德一帶仍著喬松年張之萬一體嚴防閻敬銘亦當檄令丁寶楨等本境嚴密布置毋任賊蹤回竄東境至僧格林沁所稱丁寶楨在甯陽遇賊以眾寡不敵接仗失利等語前據閻敬銘謹將范正坦挫敗情形陳奏並未言及丁寶楨有失利之事著閻敬銘卽行查明具奏贛榆縣令陳繼煥於僧格林沁督兵追至該縣境內既不出城又不聽購買糧草疊經該大臣持令札傳抗不遵應並任聽紳民將買取食物之兵勇扣畱及催問之差弁亦用火器打傷

實屬荒謬迥出情理之外著卽革職拏問交吳棠彭玉麟提同該
邑紳民詳審究辦並將擊傷官兵之人從重懲辦以儆刁頑江北
州縣積習疲玩已久該省督撫務當嚴飭該地方官並各團寨紳
民於官軍經過時查探明確如實係官兵不准擅開槍礮並聽軍
士與商民將糧草公平購買毋許阻撓致誤軍行將此由六百里
各諭令知之○丁卯諭內閣前因編修蔡壽祺指稱薛煥劉蓉行
賄夤緣各節經薛煥明白回奏當派肅親王華豐等會同查訊茲
據奏稱蔡壽祺所指薛煥挾厚貲而內膺重任一節連日傳到各
該員質訊據蔡壽祺供並無實據可呈實因誤信風聞遽行入奏
如有應得之咎俯首無辭等語蔡壽祺所指薛煥行賄一節業經
訊明並無實據應如何辦理之處仍著華豐等會同擬議具奏先
行完結其所指劉蓉善夤緣而外任封疆一節並著華豐等先行

詳訊蔡壽祺有無實據仍俟劉蓉明白回奏到日再行覈辦○署
漕運總督兵部右侍郎彭玉麟奏請開署缺並本缺專辦水師事
務得旨覽奏情詞懇摯出於至誠彭玉麟著准其開漕運總督署
缺所有長江水師善後應辦事宜仍著該侍郎妥爲料理○戊辰
諭軍機大臣等吳棠奏匪股繞竄江境見派隊分投扼截並請收
回署兩廣總督成命各摺片賊竄贛榆一帶疊經諭令僧格林沁
等妥籌會擊見在賊在海州境內該處南接清淮東南則趨鹽阜
皆爲裏下河最要門戶吳棠見派汪陞發等守鹽阜之射陽湖馬
家蕩等處派姚廣武馳守沐陽派滕國棟等守安東而以趙三元
水師輔之張從龍扼鹽河畱李元華等駐守清江土圩布置均屬
周妥惟此時揚防已撤賊眾兵單前敵旣難操勝算後路亦深慮
空虛歐陽利見於三月二十二日起程到淮必速張樹聲張樹珊

等軍何以尙未起程著曾國藩李鴻章飛催赴援以厚兵力吳棠
於諸軍到淮時相機調度挫賊兇鋒須力保裏下河完善之區方
爲不負委任陳國瑞詹啟綸等軍於該處地勢均稱熟悉著僧格
林沁催令該總兵等繞前夾擊輔以馬隊毋令回竄東省以收一
鼓聚殲之效曾國藩等於上年請撤揚防時曾有揚州與金陵僅
隔一江可以就近派兵接防由皖北兜剿無虞竄越後路之奏此
時揚防喫緊仍當與李鴻章力籌添兵保衛該督撫應否出省前
赴江北督剿之處並著酌度辦理迅速馳奏如裏下河被賊蹂躪
定惟該督撫等是問劉銘傳一軍已據曾國藩奏稱調赴邳宿著
卽嚴催前進如再敢觀望不前必將該提督從重參處昨據彭玉
麟奏力辭署理漕督已有旨俯如所請該員見仍以兵部侍郎總
統水師著卽迅撥輕利礮船數十號前赴清淮一帶遏防如能親

自統帶前來會同吳棠辦理剿匪事宜更資得力該侍郎接奉此旨卽著妥籌辦法吳棠另片奏清淮士民聞該漕督有赴粵之信適值寇警紛然警駭懇辭署理兩廣總督專意籌辦清淮防剿使江北士民同心協力無所猶豫等語具見體國公忠不肯避難就易深堪嘉尙吳棠仍著暫畱漕運總督本任俟此股賊匪一律埽除再赴兩廣總督署任將此由六百里各諭令知之○諭都興阿等奏逆擾鹽場堡後路官軍迎剿獲勝前敵剿賊喫緊請飭雷正綰撥軍一摺固原逆匪竄擾鹽場堡母豬渠等處疊經翁同書督飭馬隊迎剿殲擒悍逆多名該處爲由定邊赴花馬池大路逆匪連次撲犯意圖阻我糧道都興阿見檄各營步隊分行嚴守並令西蒙克西克訥依楞阿等馬隊分定邊花馬池兩路梭巡著卽嚴飭各軍實力探剿以防餉道無使後路稍有疏失甯夏攻剿情形

見在挖掘地道功將及半惟賊營日益加增官軍兵力過單前敵後路均形喫緊雷正綰見與曹克忠分勦黑城子鹽茶靈州一帶之匪諒已進兵此時花馬池定邊一路危急著該署提督迅將黑城子等處踞逆攻克節節掃蕩卽親督大隊前赴靈州期與都興阿等聯絡聲援共收夾擊之效毋得顧此失彼如黑城子攻克尙需時日卽著先其所急酌量分撥兵隊兼程北進救援甯靈後路以期餉道無失本日又據沈桂芬奏遵撥茅津渡楚勇一千名由袁復清羅承勳統帶先後赴甘請將都興阿原調大同兵一千悉數收回庶此後籌解勇糧方能周轉等語都興阿前敵兵勇尙形單薄其能否將此項大同兵撤回晉省之處著該將軍酌量辦理至沈桂芬所稱楚勇業已先後赴甘請將陳東霖勇糧仍由都興阿等籌給之處卽著照所請辦理山東逆匪見雖竄赴贛榆一帶

去晉稍遠惟逆蹤飄忽靡常且恐分股回竄東豫潞澤一帶之防仍不可稍涉大意著沈桂芬妥籌調派以備不虞將此由六百里各諭令知之○己巳諭軍機大臣等傳諭陝西巡撫劉蓉前據倭仁等奏遵旨傳訊編修蔡壽祺供稱摺內挾重賞而內膺重任善黃緣而外任封疆二語係指薛煥劉蓉行賄黃緣當經降旨令薛煥劉蓉各據實明白回奏以憑查辦除薛煥已遵旨覆奏外該撫於接奉諭旨後即將該編修所指善黃緣而外任封疆據實迅速明白回奏不准一字欺飾倭仁等原摺著摘鈔閱看將此諭令知之○諭吳昌壽奏遵抵豫境相機截剿並將蔣凝學所部畱營各摺片見在豫匪雖由山東逸入江北之海州贛榆難保不復行回竄卽著吳昌壽探明何路有賊卽由何路進剿埽蕩逆氛並將各路伏莽次第殲除廓清全境至豫省吏治廢弛已久該撫到任後

務須加意整頓並實行團練使官爲經理與民同心相保相衛庶彫敝之俗煥然一新以副委任姜玉順譚仁芳等軍並著吳昌壽檄令趕緊進紮酌度機宜妥爲布置賊蹤見雖去鄂愈遠惟該逆奔竄剽疾異常楚省邊防仍未可稍涉大意著官文督飭成大吉等營扼要嚴防妥爲備禦蔣凝學一軍疊次諭令楊岳斌飛催赴援肅州茲據吳昌壽奏請將蔣凝學所部畱營調遣等語甘省偏地賊氛肅州被匪攻城尤形危殆該州爲出關糧運要道關繫極爲緊要不能不先其所急以資厚集而保危城蔣凝學一軍仍著楊岳斌懷遵前旨催令迅赴肅州相機進剿毋再稍涉遷延楊岳斌務當督率全軍兼程前進以解倒懸如豫省兵力不敷卽著吳昌壽咨調得力楚軍合力會剿將此由六百里各諭令知之○諭雷正綰奏官軍攻克黑城子賊巢收復鹽茶廳城一摺據稱官軍

攻克固原後由何家溝等處進攻與張集馨等所部合圍黑城子連日疊有斬馘三月十五日各軍分路環攻奮勇登城當將黑城子老巢攻拔並擒斬逆首黑虎等多名曹克忠一軍移營進逼鹽茶廳城連日將由元套子塘赴援之馬三混等賊隊擊敗乘勝直抵城下三月十七日曹克忠親督馬隊力攻南門施放噴筒火箭先將南門燒毀各軍梯縋登城擒斬逆首田成吉等多名遂將廳城克復剿辦甚爲奮勉餘逆見踞李旺堡同心城及何家堡一帶著雷正綰會同曹克忠督飭各軍乘此聲威迅將李旺堡等處匪巢次第掃蕩進規靈州卽與都興阿等聯絡進取惟昨據都興阿奏稱逆回犯擾鹽場堡花馬池等處圖截官軍糧道該處情形緊要兵勇不敷分布當經諭令雷正綰撥兵援應見在黑城子等旣經攻克該逆被剿窮蹙設鎚而走險與甯夏匪徒勾結都興阿等

營後路兵力較單若該逆乘閒滋擾則所關實非淺鮮雷正綰務當酌度緩急分撥弁兵馳赴定邊花馬池一帶遏賊奔突爲都興阿後路聲援都興阿穆圖善卽懍遵前旨激勵諸軍將甯夏漢城攻拔卽可騰出兵力交穆圖善統帶先解肅州之圍規復嘉峪關以通吐新疆各城之路前經諭令陶茂林如酌撥數營扼紮安會足資控制卽帶所部馳赴肅州甘郡一帶剿賊仍著都興阿雷正綰等與陶茂林恩麟會籌迅辦並著雷正綰飛飭魏添應之軍嚴防環慶兼飭張集馨等軍迅規河狄以杜匪蹤紛擾階州匪勢已蹙著劉蓉檄飭陝甘援師與川軍迅圖克復以便分兵赴甘定邊一帶州縣並著劉蓉飭令該地方官妥籌布置防守嚴遏東竄賊勢毋稍疏虞將此由六百里諭知都興阿穆圖善雷正綰劉蓉並傳諭陶茂林恩麟知之○諭瑞麟郭嵩燾奏迎剿竄匪獲勝見籌

防剿情形並羅定官軍攻克河垌賊巢擒獲信宜匪首李可鍾等
化州官紳殲剿廣西竄匪各摺片南陽竄賊占踞白沙肆擾粵邊
雖經官軍疊次攻剿擒斬甚多而賊勢尙未十分窮蹙瑞麟郭嵩
燾仍嚴飭方耀等軍奮力剿洗並飭李福泰嚴防大埔饒平等處
以固湖州門戶花旗股匪本係遣撤之勇乘亂滋事於粵東地勢
情形皆所熟悉尤應防其與閩逆勾結爲之引導務須嚴飭各軍
將此股匪徒先行殄盡龍巖南靖等敗匪趨撲詔安李元順吳國
泰等營皆爲所襲是黃岡饒平皆形喫緊著瑞麟等迅飭黃朝恩
等防剿兼施與何雲章聯絡進取前據李鴻章奏郭松林等軍已
飭由廈門前進未便改赴汕頭已有旨照請辦理瑞麟等以漳郡
西路兵單恐賊從此遁粵東喫重所慮亦是郭松林等軍見旣不
赴汕頭東江一帶仍著瑞麟等責成李福泰方耀等軍扼要紮守

如兵力較單卽先將各處海口及本境要隘布置完密無庸越境
協剿左宗棠徐宗幹於郭松林楊鼎勳軍到後妥爲調遣密防該
逆入海之路仍分飭各軍環攻漳郡務將逆匪就地殄除如西路
兵單亦宜酌量分撥無使大股竄入東境另片奏曾敏行進剿岑
溪賊匪疊獲大勝攻破河垌等處賊巢餘逆遁歸南渡黎木等處
陸川縣匪江甲麟等餘黨勾結博白等處股匪竄擾化州經署知
州張欽泰募勇攻剿斬馘甚眾追至天井地方盡殲餘孽剿辦均
尙得手仍飭令將逸匪全數拏獲羅定化州出力員弁著瑞麟等
擇尤彙案保獎廣西容岑伏莽尙多與東省緊相接壤非兩省合
力夾剿未易蕆事前諭令馮子材馳赴信羅之交與西軍會合進
取計日當已到防卽著該提督檄飭將士認真剿辦張凱嵩所派
弁勇已抵容岑務當與之聯絡聲勢大張撻伐盡殲醜類使東西

兩省邊圉皆獲謐安以期不負委任卓輿方耀素不相能瑞麟等務須妥籌驅策之方不令駐紮一處方爲妥善將此由六百里諭令知之○以張之萬署河東河道總督調吳昌壽爲河南巡撫以鄭敦謹爲湖北巡撫由河東河道總督遷○裁湖北漢口鎮遊擊員缺增副將一移道士汛都司於漢口並撥馬步兵丁二百二十名改設道士汛守備一○予周臣散宜生北魏臣高允從祀 歷代帝王廟○庚午諭內閣文麟奏古城失守合城官兵同時殉難一摺古城漢回變亂圍困城池疊經惠慶督率兵勇竭力堵禦賊匪屢次開挖地道轟塌城垣官兵奮勇迎敵將賊擊退城中婦女亦皆出力協助隨時搶築苦守至八十餘日屢經危險俱以力戰保全詎意二月初九日被賊暗用地雷將城轟陷乘勢入城合城官兵及婦女等舍死巷戰相持多時逆眾彼倡力不能支均被殺害其餘官

民人等亦俱縱火自焚古城遂致失守覽奏曷勝憤恨古城被圍日久該官兵婦女等平日同仇敵愾困守待援已屬深明大義茲以力竭城陷奮勇殺賊同時殉難情形尤爲慘烈二等侍衛古城領隊大臣惠慶見危授命大節凜然著照副都統陣亡例從優賜卹以慰忠魂烏魯木齊左翼協領噶魯岱保升直隸州同知甘肅候補通判景秀著各按本員官階照陣亡例從優議卹右翼協領德壽等五員著文麟查明該員等姓名各按官階照陣亡例奏請優卹惠慶之一妻二妾二女噶魯岱之一弟一子景秀之一妻三子前任古城領隊大臣保恆之子錫綸之生母張氏妻烏蘇氏及其妹以及台城殉難之官兵婦女等著文麟一併查明分別奏請旌卹錫綸之幼子齡岡仍著文麟查明下落具奏刑部主事錫綸著准其暫畱文麟軍營差遣委用至此股逆匪倡亂膽敢糾集醜

類攻陷城池荼毒百姓實爲罪大惡極斷難稍稽天討前已調派
關內大兵十數萬剋期出關大申撻伐卽著帶兵各員迅速分道
前進殄滅逆氛廓清邊徼用副弔民伐罪至意○諭軍機大臣等
本日據文麟馳奏古城失守請兵迅速前來並奇台危急情形廣
鳳奎昌奏古城滿城失守各摺德克吉訥奏路途梗阻難進一摺
覽奏曷勝焦灼古城旣陷奇台勢益孤危此股逆匪雖經烏魯木
齊回匪勾結西行與烏城遣勇難民相拒難保不去而復來古城
爲奇台門戶文麟正當乘該逆西行之際將古城奇台濟木薩等
處防剿事宜妥籌布置以期力持危局穆家溝一帶賊匪占踞木
壘街市經文麟飭奇台令恆頤挑派民勇將賊匪擊敗所辦甚好
仍著激勵該勇丁將穆家地山溝股匪悉數殲除以清後路所請
科布多撥銀八萬兩本日已諭令廣鳳等迅將見存銀五萬兩撥

赴奇台並諭令德勒克多爾濟將科布多所用古城之餉銀三萬由綏遠城籌解仍著文麟派員迎提以應急需文麟辦事尙知大體嗣後奇台及該處東西路一帶軍情卽著文麟隨時奏報所刻木質關防准其印用回務章京達薩杭阿經扎克當阿派帶民勇回兵及巴里坤營兵前往奇台任聽回兵在木壘折回及至木壘交戰時僅有巴里坤綠營兵五十名該章京並不帶勇進剿一聞古城失守卽將兵勇木壘商戶等千餘人帶同東去以致奇台人心惶亂玩誤已極著扎克當阿迅卽查明嚴參重辦毋稍徇縱回兵因何山木壘折回亦著扎克當阿會同伯錫爾查辦前調甘涼肅官兵二千餘名頭起已於正月二十日行抵哈密此時德祥是否已由哈密帶兵前進巴里坤木壘一帶與奇台毗連並著扎克當阿伯錫爾德祥妥籌兼顧一面固守哈密毋稍疏虞伯錫爾素

顧大局忠悃可嘉自可協助防守俟立功後定當懋膺恩賞也前經疊諭都興阿等撥兵出關此時鹽茶廳城已克靈州一帶勢如破竹都興阿務當與穆圖善雷正綰妥爲商酌撥兵迅速出關援應陶茂林一軍卽著遵奉前諭馳赴肅州將該處匪眾剿滅疏通出關道路並著恩麟派兵力清肅州毋稍玩誤林之望如克階州卽著都興阿檄令帶勇由西北前進與陶茂林合取肅城鶴齡一軍行抵何處並著駱秉章恩齡飛催迎提飭令西進鮑超一軍亦著駱秉章嚴催赴甘楊岳斌此時計已入陝都興阿等如已撥兵出關卽著楊岳斌督率所部與都興阿等合力攻剿靈甯成祿聯捷已有旨催令出關見在無論行抵何處卽著星夜督軍前進不准片刻停留以上所調各路之兵爲數已十餘萬不日取道出關先後雲集定可成破竹之勢德克吉納因古城已失未能前進此

時如科布多需人料理卽著在該城幫同廣鳳等辦事如科城無需多人則奇台地方緊要卽著幫同文麟辦理軍務將此由六百里諭知都興阿穆圖善雷正綰駱秉章楊岳斌成祿聯捷扎克當阿伯錫爾並傳諭恩麟陶茂林文麟知之○諭文麟奏古城失守請飭都興阿等帶兵出關並訪查奇台等處危急情形等摺片覽奏曷勝焦急古城失守關外情形愈急自奇台以東巴里坤哈密均有岌岌可危之勢若非大兵振旅出關分路進剿軍務斷無起色朝廷軫念西陲豈能聽其糜爛惟甯夏旣未克復都興阿穆圖善剿賊正在喫緊雷正綰雖有鹽茶等處之捷而靈州未拔尙不能與都興阿等合軍擊賊楊岳斌業已起程尙不知何日抵甘而肅州被圍正急嘉峪關又被獵戶占踞關內外道路梗塞辦理諸形棘手是以都興阿前次有請飭穆圖善先清甯夏再行出關之

奏朝廷深悉情形立予允准見在新疆危急如此勢不能不速籌
進兵而關內軍務未清兵力不能騰出空言亦屬無益於事昨於
恩麟奏報嘉峪關被匪占踞時諭令都興阿等先將甯夏漢城攻
拔肅清餘孽卽令穆圖善帶兵由甘肅甘涼一帶節節進剿原因
腹地未清勢不能冒昧前進該將軍等皆係朝廷倚重大臣自當
妥爲籌畫以紓西顧之憂固原餘匪疊犯花馬池鹽場堡等處都
興阿等兵力尙嫌單薄雷正綰攻克黑城子賊隘收復鹽茶正可
乘此聲威席卷長驅俟攻克靈州後卽著提兵速進與都興阿等
聯絡進兵將甯夏賊氛迅圖掃蕩一面併力西向先解肅州之圍
再將嘉峪關踞逆殲盡庶可疏通糧運於大兵出關時不至有阻
遏之虞楊岳斌自楚起程後行抵何處著懷遵堽次諭旨星速進
發並嚴催蔣凝學一軍由豫拔營西上一面催提後路兵勇兼程

趨赴甘肅與都興阿等和衷商榷權度緩急以期次第廓清又安邊圍將此由六百里再行密諭知之○癸酉諭內閣御史賈鐸奏投效軍營之翰林院庶吉士編修檢討等官嗣後不准保奏畱館開坊止准按品保升外任等語著吏部嚴定章程具奏以杜取巧尋議上除庶吉士一項於咸豐七年業經奏准有案應請毋庸再議至翰林各官在各省軍營如有克復城池斬擒要逆者侍讀侍講洗馬准保以道員選補中允贊善司業以知府選補編修檢討以同知直隸州選補其餘別項勞績止准請給升銜加級或交部議敘概不准保奏遇缺題奏及應升坊職從之○諭軍機大臣等吳棠奏賊蹤西竄見派各軍嚴扼運河並吳毓芬等軍已到揚州等處請添調水師嚴扼東境月撥清淮防餉一萬兩各摺片髮捻各匪由沐陽西竄由峒崙等處希圖渡運見又折走呂家湖西竄

邳境吳棠見派吳鳳柱等帶馬隊隨同陳國瑞追剿詹啟綸軍亦已抵邳著僧格林沁督飭該總兵等兩面夾擊痛挫兇鋒該親王馬隊至平原曠野可以縱橫馳擊如遇山路水田仍宜慎重進取劉銘傳一軍疊經諭令由蕭碭一帶進剿此時正可迎截著曾國藩喬松年嚴飭該提督懷遵疊次諭旨赴徐邳一帶剿辦如逗留不進以致賊氛肆擾卽行從重參處吳棠仍催令趙三元帶礮船駛入邳宿運河赴東境之臺兒莊韓莊一帶防賊偷渡俟江南援兵到齊悉令進紮邳宿一帶探明賊蹤越境會剿不得稍分畛域山東黃運兩河未設河防黃翼升水師計可到浦著曾國藩添撥礮船百餘號歸黃翼升統帶彭玉麟仍遵前旨帶領水師均著由浦入東兼顧山東黃河入直之路如能阻遏河險偏賊於黃運之間可期一鼓蕩平著張之萬閻敬銘查該省河道何處淺阻趕緊

挑通以便舟師來往毋令阻滯此股逆匪晝夜狂奔恐運道絲長
赴防不及卽可將此起水師畱紮濟甯一帶以防捻股日後再有
竄越安徽山東防務喫緊喬松年務當督飭各軍嚴防蒙宿等處
與劉銘傳實力剿洗閻敬銘督飭丁寶楨扼紮要隘毋任再行回
竄河北之防不可不嚴吳昌壽卽赴豫省相機調派並督飭河北
鎮道嚴密防範河標兵弁著張之萬整頓調派防河不可有名無
實吳毓芬一軍已到揚防著李鴻章吳棠卽飭該道在揚鎮撫張
樹珊等軍仍著曾國藩李鴻章催令迅速到浦歸吳棠調遣吳棠
請於揚防軍需節省項下月撥清淮餉一萬兩著曾國藩飭令江
甯藩司於四月起照數劃撥清淮防餉一萬兩按月解清不准愆
期套搭將此由六百里各諭令知之○諭雷正綰奏回匪勾結獵
戶將嘉峪關先行蹂躪旋竄入肅州東關勾結城內回民在城上

紮定安肅道恆齡在城內接仗勢甚危急與恩麟前奏情形大略相同雷正綰見已飛咨陶茂林於所部三十營內酌撥十餘營親自督帶馳赴西路剿辦與前次寄諭適相脗合即著都興阿雷正綰等飛檄陶茂林星速移軍赴甘郡肅州一帶相機進剿迅掃狂氛該提督西行後所有靖遠之防並由雷正綰抽撥勁旅會同陶茂林畱防各營嚴爲堵禦其安會適中之地應否移兵扼紮並著與曹克忠會籌隨時兼顧俟雷正綰續募楚勇到甘飭令於安會及省垣一帶扼要布置即檄遣陶茂林畱防各軍全數西征以厚兵力都興阿穆圖善雷正綰當懍遵前旨迅即規復甯夏靈州相機聯絡穩慎進取以次廓清河狄攻克關隘花馬池一帶爲都興阿進兵後路關緊要前經諭令雷正綰分兵兼顧並著雷正綰酌量迅速調派蘭州省防及各軍糧路著恩麟妥籌布置並檄飭

肅州民勇赴援迅解城圍至甘州府崇福所稟肅州回匪勾結高臺等處回匪圍撲甘郡及東樂縣丞錢寶仁所稟各情互相歧異與恩麟前奏亦不相符著雷正綰恩麟等檄飭甘州府縣各官齊集民團妥籌防剿並將甘州回匪變亂情形暨肅州城垣曾否解圍隨時偵探迅速馳奏至所稱漢民逞忿起事回民機變叵測致令互相殘殺於情事甚爲切中該提督等兵威所及務在分其曲直持平辦理庶強橫者不能得志而良懦者不至含冤所以戡亂者在此所以弭亂之源者亦在此將此由六百里諭知都興阿穆圖善雷正綰並傳諭陶茂林恩麟曹克忠知之○申諭各省宣講世宗憲皇帝聖諭廣訓○甲戌諭軍機大臣等都興阿等奏肅州西甯大通等處緊急情形請催各路援軍赴甘暨請飭慶陽糧臺籌撥餉銀請調劉廷鑑差遣各摺片楊岳斌奏行抵襄陽遵馳

赴甘一摺靖遠固原匪黨分股北竄甯郡賊黨復增屢犯平羅洪
廣營及磴口糧路在在堪虞肅州嘉峪關既被回匪占踞恆齡成
桂均經受傷口外玉門敦煌亦有回匪變亂之信肅東百餘里外
賊勢猖狂撫彝回匪滋擾甘州城內叛亂大通失守永昌亦有回
氛非但關內外音信不通而肅州一帶賊匪又復駸駸東犯甯夏
軍事諸多掣肘若非厚集兵力分路援應則糜爛之勢已成西陲
大局何堪設想雷正綰所部自攻克黑城子收復鹽茶後軍威尙
振昨據奏已派數營赴安會一帶替出陶茂林十數營赴肅甘等
處進剿當經諭令照辦並令分兵兼顧甯夏後路並傳諭曹克忠
兼顧安會矣茲覽都興阿等所奏攻城正在喫緊而援賊麀集分
擾平羅寶豐等處意圖牽掣是賊擾後路情形更緊卽著雷正綰
等懷遵昨日諭旨妥速籌辦都興阿等仍當穩慎進取妥籌防範

不可爲賊所乘。空沙金夫雖尙無蠢動情事，仍著飭令該處文武員弁妥籌防範，以備不虞。肅州被匪占踞，後成桂等受傷赴鄉，有無捏飾恆齡及在城文武員弁下落，均著恩麟查明具奏。據都興阿等奏肅東百餘里外賊勢猖狂，時有東竄之警，情形亦關緊要。陶茂林帶兵西進，後卽著雷正綰飭令派赴安會等處員弁與曹克忠督同陶茂林畱靖遠各營嚴密扼紮，截其東竄之路，以免蔓延。並著恩麟派軍隨同陶茂林進攻甘郡。肅州毋稍延緩。鶴齡一軍見在行抵何處，著駱秉章查明催令前進，迅赴肅州。鮑超之軍是否已有成數，著催令趕緊赴甘，以厚兵力。甘涼肅連番告警，嘉峪關又被匪踞，情形危急，萬分成祿聯捷均係西路大臣，必須設法先清關內，再圖整旅出關，疊經降旨嚴催。著該大臣等星夜西發，不得片刻遲延，致干咎戾。都興阿軍餉前據楊能格奏到，由慶

陽糧臺支應見在都興阿軍營用餉甚急著楊能格查照鄂場西安等軍章程給發另按月撥銀一萬兩以備軍火賞卹之用務須按數彙解毋得愆期缺乏其劉廷鑑一員前經劉蓉甄別降旨革職查辦見在都興阿營務乏員著劉蓉飭令該革員馳赴都興阿軍營以供差遣楊岳斌旣已行抵襄陽著卽星馳就道並檄令員弁勇丁隨後繼進迅抵甘省與都興阿妥速籌商以安西陲一俟行抵陝境卽行馳奏蔣凝學所部仍在豫楚之交著吳昌壽仍遵前旨催令該道隨同楊岳斌兼程西進以期得力將此由六百里諭知都興阿穆圖善雷正綰駱秉章楊岳斌成祿聯捷劉蓉吳昌壽並傳諭恩麟陶茂林楊能格知之○廣江蘇太倉州學額一名
崇明縣十名○乙亥諭軍機大臣等前據瑞麟郭嵩燾奏龍巖南靖敗匪趨撲詔安黃岡饒平皆形喫緊茲復據奏稱探聞詔安縣

城已爲賊陷漳州逆匪數萬竄至平和龍溪地方並屯駐上下坪等處距楓則僅及三四十里等語漳州等處逆匪不下二十餘萬見經閩軍層層布置東南北三面漸成合圍之勢賊之去路惟廣東一面見在詔安被陷潮州屏蔽已失饒州大埔等處均形喫重前諭瑞麟郭嵩燾責成李福泰方耀等軍扼要紮守此時賊氛日逼亟須加意嚴防仍著督飭李福泰方耀等軍於閩粵交界賊勢趨重之處擇要扼紮迎頭截擊並催令卓興一軍迅速到防認真扼守毋令賊匪乘虛竄入吳棠見因髮捻竄入邳境清淮防務緊要未能赴粵瑞麟不得存五日京兆之見務當與郭嵩燾妥籌布置固守嚴疆用副委任汪李等逆均係粵賊中渠魁雖經官軍圍逼而匪黨尙眾困鬪鋌走自在意中閩省此時兵力不爲不厚左宗棠老於戎事自必成算在胸務須將此股逆匪就地殲除斷不

可縱令闖入粵境或遁入海道致剿辦復行棘手賊勢既趨重西面左宗棠徐宗幹卽當調派勁旅嚴密分布截其西竄之路以便方耀等軍專顧粵邊力保完善均著妥速籌辦近日剿辦情形並著左宗棠等迅速馳奏將此由六百里諭令知之○諭傳諭署福建臺灣鎮總兵官曾元福臺灣道丁曰健丁曰健奏督軍按拏巨匪並查辦善後妥籌防海及擒獲嘉義逆首等正法各摺片臺灣彰化內山匪黨前經丁曰健督軍勦辦將洪禧等股踞逆悉數殲除臺灣一律安定見復嚴督各軍分路接剿將著名股首莊明得廖阿螺及洪禧之胞兄洪狗等擒獲其潛匿平林山頂之悍賊洪花亦經官軍用槍刺斃其妻李氏身受銃傷均梟取首級示眾復將草田莊等賊巢攻破獲匪多名並擒獲羅務等匪黨均先後訊明正法嘉義匪首嚴辦亦經曾元福派隊殲斃獲黨多名剿辦尙

屬認真著曾元福丁曰健查明所獲要犯洪狗洪花等是否的係正身不得稍涉含混致令漏網潛逃復生他變其在逃之要犯陳鯨及零散餘匪並著督飭地方文武員弁團勇分路按拏以期淨絕根株永弭後患一切善後事宜著一併妥爲籌辦據丁曰健奏稱賊黨四處逃匿未便屯兵糜餉自應量爲裁撤卽著斟酌情形隨時遣撤仍酌畱兵勇將潛匿之匪實力接捕以期淨盡漳州賊匪未平深恐勾結渡臺爲入海之計著曾元福丁曰健仍遵前旨於海口要隘安籌防範毋令闖入臺地所有斬獲嘉義股首嚴辦等出力人員著曾元福等查明保奏毋許冒濫○以福建臺灣全境肅清賞道員丁曰健布政使銜總兵曾元福提督銜○丙子諭軍機大臣等閩敬銘奏賊蹤復竄海贛一帶東省籌防情形李鴻章奏飭催諸軍赴援准徐各摺此股竄匪經僧格林沁追剿由海

沐折回邳境復竄至贛榆東安莊等處往來奔突已成窮寇無歸之勢曾國藩李鴻章所派張樹珊張樹聲歐陽利見水陸等軍業已起程剋期當可抵浦劉銘傳周盛波等部亦由六安徑赴徐宿是南路兵力厚集卽著吳棠於各軍到後相機調遣與僧格林沁大軍聯絡夾擊並酌量分撥水師於濟甯一帶扼紮以杜賊沿河上竄之路僧格林沁見已追賊至邳著督飭馬步各軍乘勢力剿仍穩慎進取務將此股逆匪一鼓殄除毋令再行回竄如兵力不敷卽飛催英翰詹啟綸等軍到營從北面兜剿與江南派援各軍合力夾擊該處東濱大海若能三面蹙之必可就地殲除僧格林沁當嚴密調派毋失機會東省嶧滕蘭莒各處與邳贛壤地緊接該逆經西東兩路夾剿恐仍圖從此北竄著閻敬銘嚴飭派出之丁寶楨韓登泰兩軍實力防守並著僧格林沁妥籌兼顧彭玉麟

仍遵疊次諭旨帶領輕利礮船由浦入東阻遏河險毋稍遲緩其河道淺阻之處並著咨會張之萬趕緊挑濬見在水師僅有歐陽利見一軍赴浦尙形單薄仍著曾國藩等迅催黃翼升礮船星速前進扼要防紮豫省河南北各處防務著吳昌壽嚴密布置並將境內餘孽掃蕩廓清直隸距賊較遠而大名等處防堵亦未可稍鬆劉長佑仍當檄飭將弁認真防範青州一帶爲濱海要區著閻敬銘咨會恩襲豫籌布置宋憬詩等夥黨王振聲糾眾圖亂經閻敬銘密拏正法尙爲安速仍當嚴飭各屬地方官嚴密訪拏以消伏莽而清內患皖北蒙亳地方衝要著喬松年調派得力將弁妥籌守禦毋稍大意將此由六百里各諭令知之○丁丑諭軍機大臣等勞崇光張亮基奏苗匪闖入玉屏經楚黔官軍會同克復及收復天柱勦辦思南府屬教匪各摺片黔省下游苗匪自陷天柱

後竄擾思州青谿一帶復襲陷玉屏經周洪印督率楚師與葛梁治所派鄉團會同進剿當將縣城收復惟教匪土匪尙有零星小股盤踞思州府屬後山洞著勞崇光等督令陳昌運派軍實力剿洗毋任蔓延此次玉屏失陷湖南總兵田宗揚及團首吳遇隆等均帶兵練駐紮西北門外何以並不援應乃稱各軍分投進剿正在鏖戰該匪緣梯而上遂入縣城情節殊爲恟恍著勞崇光李瀚章等嗣後務飭黔楚官軍聯絡一氣不准稍分畛域鎮遠府屬瓦寨等隘俱爲苗匪出入要隘湖南防邊各軍畫疆自守終不能杜賊竄越著李瀚章斟酌情形卽飭各軍節節進屯貴州境內之瓦寨長吉木樑濫洞各隘以資扼守庶於防楚援黔均有裨益李瀚章未到任以前湖南防兵著石贊清妥籌調度張亮基身任封圻亦當力圖振作廓清疆圉毋得徒恃客兵致賊勢日形滋蔓天柱

踞逆雖經陳昌運調派團勇馳往會剿該匪棄城而逃惟賊並未
大受懲創著勞崇光等督飭陳昌運激勵士卒相機痛剿嚴守城
隘毋得再有疏虞河西大堡及大小聖教匪分竄舒家渡官舟三
尖堆等處疊經兵勇擊敗回巢若不乘勝爲擣穴殲渠之計恐該
匪去而復來又肆猖獗著卽嚴飭各軍設法進取將大堡大小聖
各賊巢次第蕩平以清後患張亮基另摺奏病體難支請開署缺
等語貴州地方廢爛已極該署撫豈得遽行引疾乞休爲畏難之
計張亮基著賞假三箇月調理貴州巡撫著裕麟暫行護理將此
由六百里諭知勞崇光張亮基李瀚章並傳諭石贊清知之○予
貴州殉難知州龔世增等祭葬世職○戊寅諭內閣朕奉 慈安
皇太后 慈禧皇太后懿旨本日恭親王因謝恩召見伏地痛哭
無以自容當經面加訓誡該王深自引咎頗知愧悔衷懷良用惻

然自垂簾以來特簡恭親王在軍機處議政已歷數年受恩既渥委任亦專其與朝廷休戚相關非在廷諸臣可比特因位高速謗稍不自檢卽蹈愆尤所期望於該王者甚厚斯責備該王也不得不嚴今恭親王既能領悟此意改過自新朝廷於內外臣工用舍進退本皆廓然大公毫無成見況恭親王爲親信重臣才堪佐理朝廷相待豈肯初終易轍轉令其自耽安逸耶恭親王著仍在軍機大臣上行走毋庸復議政名目以示裁抑王其毋忘此日愧悔之心益矢靖共力圖報稱仍不得意存疑畏稍涉推諉以副厚望

○己卯諭軍機大臣等劉長佑奏添調兵勇偵探賊蹤見辦情形一指直隸地勢平衍無險可扼自應於適中之地厚集兵力以資援應而遏奔衝該督見於威縣城內畱駐兵勇一千餘名曲周清河屬境其駐兵勇二千餘名並飭令副將崔福泰管帶兵勇各五

百名駐防元城縣屬小灘地方策應開東長一帶防軍仍令徐廷楷於抽練兵內選備六百名聽候調遣辦理尙爲周妥著卽督同臬司李鶴年嚴密巡防毋稍鬆懈聊城縣積匪王振聲在沙鎮傳帖聚眾已據閻敬銘奏稱將該匪訪拏正法而餘黨尙未盡除難保不散而復聚仍著該撫督飭地方文武嚴搜餘黨悉數捕誅毋任一名漏網並著劉長佑於交界地方一體緝拏毋任竄入大名一帶勾結蔓延僧格林沁所寄劉長佑函內聲稱賊於初二日竄赴邳州經官兵趕至復由東北遁過沂河旋又折自紅花埠向東南而逸等語此時海州贛榆一帶當又喫緊該匪被追窮急難保不由海口覓船遁入外洋著吳棠督飭該地方官將海州贛榆等處海口船隻先行提往他處毋爲該逆搶擄歐陽利見水師業已起程赴浦黃翼升礮船仍著曾國藩李鴻章迅催前進均著歸吳

棠調遣一面嚴堵裏下河水路一面嚴扼海口以防紛竄張樹珊等軍計可抵浦卽著吳棠督令張樹珊等與江北清浦所派諸軍水陸嚴防分投堵截沂郡日照等處海口卽由閻敬銘設法嚴防沂曹陸路亦由閻敬銘督飭丁寶楨韓登泰兩軍實力防守至賊匪竄向東南一隅逼近海濱僧格林沁正當乘此機會嚴飭各路援軍同時並舉聚而殲旃劉銘傳周盛波兩軍已由六安徑赴徐宿卽著吳棠飛速迎提相機調遣飭令會合僧格林沁之軍夾擊以期一鼓殄除英翰詹啟綸等軍亦可由僧格林沁酌量添調至此股逆匪蹤迹飄忽奔突靡常經官軍痛剿難保不回竄皖豫喬松年吳昌壽務當於交界處所分布兵勇檄令在防將士嚴密扼守毋令匪蹤闖入本境致滋延蔓將此由六百里各諭令知之○左宗棠徐宗幹奏李逆侍賢於漳州東北浦南金沙烏頭門社一

帶添築賊壘以圖繞襲官軍後路總兵劉清亮馳抵江東橋見賊勢方趨重漳北卽率所部進駐北溪黃少春進紮北尾橋高連陞進紮東路好景山以相聯絡二月二十五日黃少春復飭副將周紹濂等移紮北尾橋對港翰林洲賊首僞天將譚姓率悍黨千餘來撲周紹濂等營壘當經官軍擊退黃少春見賊憑橋抗拒復與謝復雲分路鈔襲賊卽敗潰官軍追殺過橋斃賊二百餘名三月初二日城賊復出數萬來犯黃少春率周紹濂等各營從右路迎擊賊卽敗竄追至田東社伏賊突起周紹濂挺矛衝入賊陣謝復雲督各哨突前猛擊賊不能支時高連陞亦將崎下橋之賊擊敗衝殺而前該逆恐官軍過港截殺悉向樓內遁去計是役共斃悍賊三百餘名初七日高連陞率所部進紮響水橋復飭副將丁賢發軍功錢桂仁兩營過河築壘偪之黃少春飭各營伏於北尾橋

河邊自率馬隊與高連陞從東關大路而進突遇賊一二千人高連陞率隊衝殺黃少春繼之賊且戰且走追至東關斃賊百餘名忽南門壘賊數千從河邊鈔至城賊與東門壘賊遙擁而出高連陞飭張志公等扼堵河邊自率洋槍隊與黃少春分路猛戰擊斃悍賊十數名揮軍奮力前進賊退入卡程學明等將河邊之賊擊敗亦率隊環攻賊卡忽西門外賊七八千人繞至對港排列高連陞黃少春飭各營槍礮環擊斃賊數百名當賊由東路來犯北門及樓內亦各出賊數千向北尾橋衝來周紹濂等督隊迎擊黃少春率謝復雲等從左路橫出截之賊眾敗走計是役斃賊共千餘名該逆復糾添汪逆悍黨五六萬人於十三日一撲響水橋一撲北尾橋營壘其由響水橋一路來者經高連陞張志公等先後擊敗逆首李侍賢僞天將李學金復喊各賊回關官軍乘勝猛進馬

隊繼之羣賊退入村後程學明等各率親兵疾追高連陞督隊壓擊賊勢不支紛向東關逃竄其由北尾橋一路來者黃少春率副將李良平等迎敵相拒半時樓內伏賊數千從畱岡山突出官軍奮力衝殺賊仍死拒不退黃少春親督各哨向前衝突陣斬悍賊百餘名適魏光邴從崎下橋橫截而來兩路夾擊賊遂大敗其樓內來援之賊經總兵劉端冕等截殺斃賊二百餘名計是役共斃賊二千餘名傷賊不計其數十四日城賊分撲北尾橋營壘黃少春當飭周紹濂等三路奮擊斃賊數百名東路之賊圖撲高連陞營壘高連陞一面飭各營嚴陣以待一面函商提督郭松林等俟賊來撲卽各率所部合剿李逆侍賢以兩次猛撲皆不得逞復嗾南靖來援之賊並城壘各逆四路鈔來適郭松林所部蘇軍馳至卽與高連陞踰嶺迎擊黃少春率同各隊過北尾橋助剿郭松林

親督小隊直擣中堅羣賊辟易官軍乘勝急進各路之賊俱敗李侍賢復督各賊回撲洋槍隊斜出轟擊賊眾自相蹂藉及轟斃溺斃者不可勝數計是役共斃賊三四千名帶傷以萬計王德榜一軍由龍巖馳赴漳北華封見逆賊麇聚金沙一帶遂分兩營駐豐山自率所部進紮潭口與劉清亮各營互相聯絡正擬過河痛擊詎該逆見官軍逼近於吳倉烏頭添築兩壘對岸河邊添築四壘阻官軍進攻之路王德榜飭遊擊戴清輝等從下游過河排礮轟擊逆賊棄壘而遁劉典一軍馳抵龍巖後卽率所部進駐州南飭副將張福齊等紮上坪總兵楊芳桂紮小尾道員李耀南紮林東偵知汪逆分踞上下奎洋等處縱橫數十里十五日飭張福齊楊鼎勳等前進甫抵白石凹大霧彌漫賊不意官軍驟至誤以爲其黨也就之官軍突起奮殺斃賊二百餘名劉典由嶺頭翻山至奎

洋山頭見賊併趨右路卽飭各營截之該逆見官軍突出其後改向奎洋山頭撲來適張福齊楊鼎勳等由左右兩路殺出劉典復飭親兵繞出賊後斃賊數百名賊敗走下奎洋援賊又分路來撲劉典督飭各營迎擊賊仍敗歸下奎洋壘中其梅林之賊亦經張福齊楊鼎勳派隊擊退計是役共斃悍賊千餘名總兵王開琳一軍馳抵永定後分所部八營扼紫湖雷鄉偵知僞天將周恒幅僞佐將譚如春等圍撲永定縣城並分犯湖雷營壘十六日王開琳飭各營分路迎剿羅瑞山等行至跌馬寨遇賊接仗斃賊多名乘勢追過岐嶺王開琳恐爲賊所鈔襲飭莫坤和等伏於跌馬寨自率中營各隊緊追忽賊從山後突至莫坤和等督隊迎擊賊亦拚死抗拒曾桂堂等先截其歸路各營四面蹙之除生擒及收降外副剿殆盡羅瑞山等卽躡蹤緊追適湖雷各營亦從東坑馳至夾

擊擒斬甚眾計是役共斃賊二千餘名生擒僞佐將譚如春僞指揮周恒南等七十餘名查賊匪白汀連肅清後汪逆竄踞龍巖永定南靖交界地方與李侍賢相爲首尾其地可由永定武平竄江西廣東侍逆緊踞漳城其黨分踞雲霄平和近日漳浦失守後丁逆汰洋復由平和陷詔安其地緊連潮嘉濱海之區以賊情言之汪逆志在竄江李逆志在入海然閩軍攻急則必以粵東爲退步論防賊下海之路在粵則潮屬之汕頭在閩則詔安之銅山漳浦之碇口爲要就見在賊勢言之則閩之銅山碇口爲尤急臣宗幹於漳浦失守時已調蕭瑞芳紅單船六號駛赴碇口臣宗棠見又飛催提督吳全美速帶所雇紅單船二十號拖帶二十號駛赴銅山其未到防之先已由曾憲德鄧廷枏就近派撥師船前往防守論防賊入粵之路惟饒平大埔最爲衝要粵省防邊聞尙周密方

耀一軍亦已調回兵力似不爲薄然臣等接閱署撫臣郭嵩燾來書仍以驅賊入粵爲疑而閩軍方由東而西由北而南雲霄平和漳浦詔安中隔賊氛實無兵力兼顧細思江西防兵尙厚賊之竄江惟永定一路臣等見調總兵王開琳之新老湘營七千餘人及康國器等所部五千餘人嚴防永定足以遏賊奔衝婁雲慶一軍近始由江西赴武平尙在王開琳康國器之後於援閩防江均屬不急之著武平距粵咫尺似可移緩就急爲江西助粵之軍庶廣東固而由粵竄江西之路亦可無虞伏乞皇上飭下江西撫臣廣東撫臣爲該軍妥籌接濟以收聚殲之效漳州東路有高連陞黃少春兩軍連日賊眾猛撲均經擊敗臣等見飭王德榜劉清亮等迅將漳北各賊埽除其漳南一路蘇軍已到十營十六日郭松林率洋槍隊助戰甚爲得力楊鼎勳一軍亦於十七日到厦足扼

石碼海澄並截侍逆南竄漳浦之路臣等自當隨時商調慎以圖之此次各路官軍以寡勝眾實屬異常奮勇請將尤爲出力及陣亡各員弁先行開列懇請分別獎卹其餘出力員弁甚多可否由臣存記彙案請保上諭前據瑞麟等奏閩賊趨重西面恐以粵東爲去路當經諭令左宗棠調兵分布截其西竄之路茲據左宗棠等奏稱閩軍自永定至長泰北路要隘均有布置漳州東路有高連陞黃少春兩軍連日將賊眾擊敗腹地亦可無虞漳南一路有郭松林等軍扼截是東南北三面布置均尙周密惟西面之雲霄平和漳浦詔安等處賊氛甚熾左宗棠等亦慮及閩軍攻急必以粵東爲退步徐圖逞其竄江下海之謀見已調王開琳康國器等軍嚴防永定一帶足以遏賊奔竄而婁雲慶一軍萬餘人見在武平距粵較近正可移緩就急爲江西助粵之軍著孫長紱卽飭

叟雲慶統帶所部迅速前進瑞麟郭嵩燾一面迎提相機調撥以固邊防饒平大埔爲粵省衝要之路方耀一軍已經調回本境粵邊防軍亦不爲薄瑞麟郭嵩燾務當督飭李福泰等實力嚴防如遇賊蹤竄近卽飭各軍迎頭截擊毋得專待客兵致多貽誤汪逆既有竄江之意孫長紱亦當先事防維毋稍大意見在漳州之賊疊經官軍痛剿其勢漸蹙左宗棠等仍當督飭高連陞王德榜劉典等軍乘勝進剿力拔漳城並將雲霄和平等處次第掃蕩毋稍延緩硃口銅山均係閩省海邊要口徐宗幹已調蕭瑞芳紅單船六號駛赴硃口左宗棠又調吳全美統帶紅單拖罈等船四十號駛赴銅山卽著催令星速到防並督飭該提督實力嚴密梭巡不得稍有疏失石碼海澄等處卽飭楊鼎勳等軍嚴密扼守以截侍逆南竄之路粵省之汕頭海口瑞麟等亦當加意嚴防務臻周密

將此由六百里諭知瑞麟左宗棠徐宗幹郭嵩燾並傳諭孫長紱知之○諭恩麟奏甘省西南兩路賊勢延蔓請飭催川湖等省援軍並曹克忠攻剿鹽茶廳踞匪獲勝各摺片肅州逆勢猖獗經恩麟派軍援應在沙灘廟與賊接仗因眾寡不敵登時潰亂甘州回匪占踞黎園察漢俄博二營永固堡城亦被獵戶攻陷洪水營回匪又復滋事該護督見已添調昆都倫蒙兵二三千名就近助剿肅州咨商陶茂林抽出數營徑赴甘州堵剿並咨催鮑超等軍趨程援應是肅州逆燄既張甘郡亦岌岌可危況該逆勾連撤回欲圖大逞儻援軍日久遷延必致益形糜爛前據都興阿等奏甘州城內叛亂肅州嘉峪關被匪占踞關內外音信不通肅州之匪又復東犯甯夏軍事掣肘疊經諭令雷正綰派兵前赴安會替出陶茂林十數營赴肅甘等處進剿並諭恩麟派軍會擊卽著雷正綰

迅飭陶茂林督率所部十數營前赴肅甘等處與恩麟調派各軍會合進剿毋稍延緩都興阿穆圖善務當督飭相機進取攻拔甯夏雷正綰仍遵前旨兼顧甯夏後路迅克靈甯疏通北路前據楊岳斌奏業已行抵襄陽當經降旨催令迅速西進刻下甘省回氛日熾關內外信息不通亟應先清關內再圖進剿著楊岳斌懷遵疊次諭旨迅卽趲程前進毋再遲延干咎鮑超一軍諒已部署起程著吳昌壽仍遵前旨飭令隨同楊岳斌大軍西發並著楊岳斌交著吳昌壽仍遵前旨飭令隨同楊岳斌大軍西發並著楊岳斌李鴻章飛調金國琛李鶴章各率所部援軍迅由陝西鳳翔一路馳赴甘境毋稍延緩肅州等處既有陶茂林等軍足敷剿辦蒙古兵歷次調赴西路均不得力恩麟添調之昆都倫著毋庸調往以節糜費將此由六百里諭知都興阿穆圖善雷正綰略秉章楊岳

斌李鴻章吳昌壽並傳諭恩麟陶茂林知之○予福建陣亡遊擊黃柳溪祭葬世職並殉難知縣趙人成祭葬世職建祠○壬午

上詣 大高殿祈雨○諭內閣前據倭仁等覆奏會議編修蔡壽祺所陳八條一摺內如廣言路勤召對復封駁振紀綱正人心五條或事屬已行或諸多窒礙業據倭仁等奏駁惟所稱勞崇光曾國藩等均係特簡重臣該編修以私見妄行訾薄礙難置議等語自係因各省軍務摺件並歷年諭旨例不發鈔者較多是以無憑置議據軍機大臣文祥等按照蔡壽祺所陳各條將咸豐同治年間冊檔逐細詳查覆奏俱與蔡壽祺原陳情節不符誠如倭仁等所奏該編修以私見妄行訾薄朝廷用人行政均經博訪周咨詳細審慎至再至三從未稍涉輕忽況曾國藩駱秉章等自咸豐年間以來歷任封圻勦平各省巨匪功績昭然曾國荃克復安慶金

陵勲勞懋著朝廷於各該大臣等倚任方專亦豈該編修一人私議所能搖惑蔡壽祺已另照華豐等所擬交部議處外其倭仁等議准之整團練一條著各該地方官認真辦理以杜流弊其裁減釐局及軍營虛報戰功各節前已疊降諭旨令督撫及統兵大臣悉心稽查覈實奏報著再行申諭各該督撫暨統兵大臣懍遵前旨力除積弊以恤商民而肅軍旅○諭軍機大臣等吳棠奏賊蹤再撲沐宿境內官軍嚴防布置情形喬松年奏遵飭劉銘傳赴徐州請令英翰仍紮宿州閻敬銘奏賊匪復竄東境官兵遇賊接仗情形各一招逆匪紛竄靡定往往乘虛奔突自竄擾海沐後南路兵力陸續雲集又有僧格林沁盡力躡剿該逆不得逞志於東南勢恐折而西北是以前諭僧格林沁督飭馬步各軍從北面兜剿毋令再行回竄茲覽閻敬銘所奏賊由郟城蘭費竄至嶧縣西南

之褚頭林等處官軍接仗受傷經丁寶楨督軍追壓該逆直向正西狂奔丁寶楨已由鄒滕一路繞赴東平防賊北竄見在該逆已由嶧縣邊界西趨兗濟正當其衝丁寶楨向稱知兵是以該撫令其出省剿賊見既退守東平去賊已遠兗濟一帶並無得力兵勇駐紮此時賊勢縱橫毫無阻遏任令長驅橫衝其將何所底止著閻敬銘遴選得力將弁增募勇丁於兗州濟甯一帶分投設防遇賊卽擊一而檄令丁寶楨穩紮東平防賊北竄僧格林沁聞賊北竄之信諒已督隊跟追仍著該親王繞出賊前督飭將弁並東省兵勇極力兜剿將賊逼向東南庶可與淮徐之兵聯絡擊賊以期收聚殲之效邛宿清淮一帶防軍業經吳棠分路布置備賊勢南趨卽令各路兵勇隨處翦除毋令再行旁竄運河水師礮船如能由連入黃駛至東明長垣一帶亦可輔陸路兵勇所不及著吳棠

等斟酌情形妥籌辦理吳棠前擬於濟甯一帶派撥得力師船駐紮遏賊由黃運兩河上竄之路已有旨照所請行此時賊氛甚緊著卽迅速調派毋落後著直隸大名一帶在在與東省毗連前據劉長佑奏已於威縣曲周清河各境調兵駐防著該督檄令在防各兵勇實力遏截毋稍疏懈該逆由兗境狂奔而西若不盤踞東境恐由曹單一帶循熟南趨本日據官文奏鮑超所部勇丁在金口潰散若該逆向西南奔竄與此起潰勇勾結所患更巨吳昌壽想已抵豫著嚴飭河北鎮道整頓兵練力圖扼剿毋稍大意河標兵弁著張之萬抵署任後訓練調派分段設防以期周密賊匪紛竄靡常宿州當扼要之地防守不可不嚴喬松年已飭張得勝移紮泗州朱淮森移紮臨淮並催劉銘傳拔隊赴徐該提督到徐州後應卽分軍出境迎擊該撫業經函商僧格林沁令英翰仍紮宿

州卽著照所擬辦理以期得力將此由六百里各諭令知之○諭
官文奏霆軍赴川路經鄂省金口地方乘閒潰散一摺據稱總兵
宋國永馮標統帶鮑超舊部十八營由江西行抵漢陽經官文給
發水腳優加犒賞派員護送前進師次金口該勇丁等不願西行
全行潰散覽奏實堪駭異直隸宣化鎮總兵宋國永甘肅涼州鎮
總兵馮標有統帶之責何至於全軍潰散毫無約束實屬咎無可
辭姑念從前尙有戰功均著卽行革職並撤銷記名提督仍飭前
往鮑超軍營效力贖罪以觀後效其首先煽惑眾勇潰散之儘先
參將歐陽輝遊擊羅三元都司李守澤李受春千總梅里光均著
先行革職嚴拏務獲正法以肅軍律此起勇丁降眾叛卒雜出其
中類多桀驁之徒見在投回者雖有二三千人而結隊上行者尙
屬不少難保不聚而生變該勇丁等見由咸甯一路竄去行走甚

急官文已派歐陽疊成大吉等軍拔隊跟追繞前攔截著卽飛催前進如該勇丁尙遵約束除將爲首之犯擒治外其餘脅從之眾卽著妥爲彈壓分別安插儻敢恃眾抗拒卽當合力兜拏就地殲除毋令逸入鄰境致貽後患其業經投回勇丁著官文分別遣散毋令別滋事端見在官軍旣星夜跟追該勇丁等自必聞風急竄趨向靡定江西安徽湖南等省路路可通著曾國藩孫長紱喬松年李瀚章石贊清各派兵勇於湖北交界地方飛速探蹤攔截並飭令各該地方官一體嚴防協力兜拏免致蔓延爲患不可稍涉大意鮑超所部之勇旣多潰散是出關一節勢難成行該提督於剿辦粵匪素著聲威見在福建漳州之賊尙在負隅並有西竄粵東之意前已飭令鮑超舊部婁雲慶由武平赴粵援應若得鮑超前往督帶必更得力著駱秉章迅卽傳知鮑超趕緊起程取道湖

北一帶順便將已散勇丁招集若干申明紀律統帶赴閩剿賊以贖前愆毋庸前赴西路剿賊該提督素稱勇往諒不至遷延觀望貽誤事機也官文另片一件畱中將此由六百里諭知官文曾國藩駱秉章喬松年李瀚章並傳諭鮑超石贊清孫長絨知之○諭聯捷奏行抵晉省督兵趨程前進並催調軍器一摺前因嘉峪關被匪占踞肅州甘州回黨變亂古城失守疊經諭令都興阿等撥兵援應陶茂林馳赴甘州進剿並命成祿總統聯捷諸軍星速西行見在聯捷業由晉省起程前進卽著仍遵前旨探明該提督行抵何處飛速知照會師西進與甘省諸軍會合將肅州甘郡回氛次第掃蕩規復嘉峪關疏通要路以期剋日大舉毋稍延緩該營兵勇起程前進所需軍械實屬刻不容緩著沈桂芬迅飭該省藩司將未備軍械趕緊造齊派員解交聯捷軍營以資攻剿將此由

五百里各諭令知之○諭駱秉章奏官軍會剿階州踞逆續獲勝仗見籌攻城情形一摺階州城外賊壘疊經胡中和蕭慶高周達武等督軍進剿拔逆壘數處斃賊無算蔡逆困守孤城已成釜魚檻獸著駱秉章劉蓉督飭在事各軍會合林之望所部聯絡一氣迅拔堅城盡殲羣醜至洮岷回匪既有竄至西固地界之信尤當飭令諸軍嚴加防範毋令得與階州踞逆勾結爲患前據劉蓉奏階州城池二月內必可攻克見已四月中旬何以尙無捷音甘省回氛徧地亟應厚集兵力痛加剿戮前經諭令林之望於克復階城後卽飭所部迅援肅州若因一隅之地久攻不下三省兵力悉爲牽掣以致甘省賊氛日熾一日糜餉老師恐在事員弁不能當此罪戾也將此由六百里諭知駱秉章劉蓉並傳諭林之望知之○諭駱秉章奏官軍攻剿滇黔各匪疊獲大勝一摺滇黔各匪不

可數計時思竄擾川疆雖經川省之兵越境攻剿連番獲勝而川
滇黔三省邊界袤延既廣防範稍疏難免此輩彼竄蔓延鄰疆勞
崇光身任兼圻疊經諭令迅赴滇境督兵剿賊著懷遵疊次諭旨
迅赴迤東督飭在防兵勇會同川軍將各路逆匪次第剪除林鴻
年亦當妥籌布置馳往昭通相機辦理滇省地方糜爛有年兵威
不振駱秉章務當督飭在防各將士探蹤進剿不可稍分畛域劉
嶽昭唐友耕所部各營著駱秉章酌量添撥以厚兵力黔省苗土
各匪蟻聚蜂屯前據勞崇光等奏包茅仙被獲未知果否正身當
經諭令查明嚴拏見在包才才等已被曾志友擒獲正法包茅仙
下落如何著勞崇光張亮基查明具奏一面督飭黔省兵勇將各
逆匪實力掃蕩以期早日廓清駱秉章亦卽飭令許蔭棠等暨秀
山防兵會同黔省各路兵練分投截剿迅殄鄰氛以固邊圉將此

由六百里各諭令知之○予甘肅陣亡副將毛泰山等祭葬世職
○乙酉諭內閣前因降調湖南巡撫惲世臨將被參案內加抽鹽
釐一節據實陳明並錄呈兩次稟件又據大理寺卿胡家玉等縷
陳查辦鹽釐情形各摺先後交部覈議具奏茲據吏部奏稱遵查
各摺稟件惲世臨在常德府任內於咸豐九年五月出示加抽鹽
釐至十月始行具稟與原參並未上詳擅自興辦情節相符等語
此案惲世臨被參各款內加抽鹽釐一節既據該部查明實係加
抽在先具稟在後其爲有心掩飾毫無疑義惲世臨著仍照該部
原議降四級調用不准抵銷○諭軍機大臣等都興阿等奏逆回
句結固原大股竄匪官軍分投剿辦大獲全勝陣斬首逆一摺固
原竄逆趨平羅寶豐欲斷磴口糧路都興阿等派隊迎擊追斬偽
帥馬生顏殲斃餘逆甚多甯夏踞逆窺伺營盤亦經擊退其撲入

磨石口之馬賊經阿拉善親王貢桑珠爾默特派協理台吉阿布哩接仗頗有斬獲翁同書派令侍衛訥依楞阿等帶隊由花馬池赴紅柳溝途遇逆匪馬步多名官軍衝殺將賊截斷刺殺僞平西王孫義寶辦理均尙得手寶豐平羅餘賊尙恐不少當此首逆就誅賊氣已奪不難乘勝削平著都興阿穆圖善派隊接殺務將援賊埽除淨盡力克甯夏府城毋任再有勾結阿拉善親王貢桑珠爾默特守卡殺賊奮勇可嘉著都興阿先行傳旨嘉獎仍著飭令嚴防各口兼辦駝運以濟軍需俟靈甯一律肅清定當渥膺懋賞翁同書自委辦後路以來竭力籌防相機策勦訥依楞阿甫經到防卽殲巨逆均屬奮勉可嘉仍著都興阿等督飭該員等認真防剿未可始勤終怠致誤戎機雷正綰卽懷遵前旨迅攻靈州力圖克復以便與都興阿等會師甯夏廓清北路毋稍遷延將此由六

百里各諭令知之○諭都興阿奏慶陽糧餉軍火一切不能應手請飭各路協撥餉項軍火酌定數目按月徑解軍營等語甯夏地處邊外沙磧遼闊糧餉軍火籌備較難該營除正餉之外並無閒款而糧臺相隔太遠往往急需應用派員赴慶催提往返三四十日亦不能如數籌撥種種掣肘情形深恐貽誤軍事嗣後著劉長佑駱秉章吳昌壽閻敬銘沈桂芬劉蓉各將應解協撥甯夏軍營餉項卽由該營派員經理以期緩急可恃各該省旣自行斟酌定數以後務須源源接濟按月籌撥毋誤要需其五月以前所欠月餉著李鴻章照數找給歸還都興阿墊款至新舊禮字等營統共作銀三萬兩及卹賞等銀一萬兩仍由慶陽糧臺按月撥解卽著楊能格妥籌支應毋稍遲誤將此由五百里諭知劉長佑駱秉章吳昌壽閻敬銘沈桂芬劉蓉李鴻章並傳諭楊能格知之○諭都

興阿等奏磴口係辦糧總匯平羅寶豐均屬運糧要區逆賊屢圖占踞截我運道刻下前敵各營軍餉久虛勇丁多有因飢思潰而歸綏辦就米石因無款墊發運腳亦延不起解等語都興阿等督兵進取甯城攻剿正當喫緊之際豈可停兵待餉坐失事機著沈桂芬迅速籌撥運費解赴歸綏刻日將辦就米石星夜起運不得再有耽延著德勒克多爾濟就近派員督催護解俾利進行而資接濟將此由五百里各諭令知之○以甘肅黃河兩岸剿賊獲勝殲斃首逆孫義寶子委驍騎校永怡布等加賞有差○甯夏官軍剿賊大捷以阿拉善親王貢桑珠爾默特協剿有功傳旨嘉獎○予甘肅陣亡副將王崇升等祭葬世職○丙戌諭軍機大臣等前因髮捻各匪竄近清淮諭令李鴻章酌度情形應否出省迅速馳奏茲據李鴻章奏清淮調到水陸各軍聲援已壯裹下河及淮徐

各郡均可無虞。蘇省所派援閩各軍，須由海道酌濟餉項。軍火江蘇邊境及蘇浙後路，仍當豫防。暫無庸出省督剿等語。所籌不爲無見。卽著照所議辦理。惟髮捻股匪見由山東滕嶧邊界西趨，有直撲充濟之勢。黃翼升、歐陽利見等水師據李鴻章稱已據吳棠先期調撥分布扼守。惟賊竄充濟卽距直境甚近，直隸僅有威縣、曲周、清河等處防兵三千餘名。元城縣防兵千名，深恐兵力單薄，不敷堵禦。劉銘傳及周盛波所部各勇合共一萬數千人，兵力有餘。畿輔地廣兵單，防堵正關緊要。著劉銘傳卽於所部勇丁內挑選精銳數千名，迅速帶赴直隸，與劉長佑會商分布直東交界地方，嚴密扼防，以固畿疆。門戶應給餉需，卽著吳棠、李鴻章迅速籌款。豫行撥給以利進行。此軍行抵東境，並著閩、敬銘竭力籌措餉需。東海關稅銀閩、敬銘亦可酌提撥解，以濟此軍食用。毋令停兵。

待餉是爲至要劉銘傳本係直隸提督該省防務責無旁貸務當
懷遵諭旨統兵北行毋許稍涉遷延致滋貽誤張詩日昨已簡放
宣化鎮總兵直隸帶兵需人著曾國藩迅飭該員馳赴劉長佑軍
營聽候調遣河間景州一帶與山東恩德一帶毗連最關緊要劉
長佑前調天津通永兩鎮兵一千名駐防景州並調海口兵五百
名駐防吳橋兵力仍恐單弱劉銘傳抵直後應如何添兵分布之
處仍著劉長佑酌量籌辦甘肅甘兩郡回匪猖獗劉松山前已
簡放肅州鎮總兵周盛波已簡放涼州鎮總兵著曾國藩李鴻章
飭令該總兵等迅卽馳赴新任其劉銘傳周盛波所部勇丁除劉
銘傳帶赴直隸外所餘兵勇仍著曾國藩李鴻章吳棠迅速派員
接統由徐州一帶探明賊蹤所向迎頭截擊詹啟綸一軍尙有數
千徐州一帶兵力儘敷剿辦著僧格林沁吳棠飛速迎提以資攻

勦見在北路一帶空虛僧格林沁務當繞向北路仙賊南趨毋令
竄入畿疆黃河一帶仍著劉長佑閻敬銘嚴密堵防不可稍涉疏
懈淮徐邳宿一帶並著吳棠喬松年飭令在防將士力行堵遏將
此由六百里諭知僧格林沁曾國藩劉長佑吳棠李鴻章喬松年
閻敬銘並傳諭劉銘傳知之○諭李鴻章奏許墅尙未設關請援
案暫緩徵稅另行籌款辦運一摺蘇州織造所管許墅關自咸豐
十年被賊焚毀後至今尙未建署開關前任織造文燧見任織造
錫祉設法就巡徵稅子口過多商情未協且所徵之稅較之釐卡
捐數多寡大相懸殊自應相時變通以期功歸實際著照李鴻章
所請准其援照杭州江甯各關停徵之案將許墅關一體暫停徵
稅俟蘇省防軍盡撤南北商貨流通卽行奏明復歸舊制所有織
造衙門應辦大運等項工需卽由李鴻章於釐捐內的撥銀錢交

該織造分別緩急量爲辦理每年撥款以三萬兩爲率其一屆應辦之數准其分作兩年辦運不准延誤干咎至織造養廉及該衙門各項用費著在釐捐項下每月撥銀二千兩俾資辦公李鴻章卽傳知織造錫祉實力奉行毋稍貽誤將此諭令知之○丁亥諭內閣前因倭仁等訊取降調編修蔡壽祺親供內稱夤緣一節係指劉蓉而言當經降旨令劉蓉明白回奏茲據劉蓉遵旨覆奏自陳起自草茅未趨朝闕於親貴之臣未識一面樞密之地未達一臧請嚴究誣罔根由等情另片奏蔡壽祺前在四川省城囚把持招搖公事經前署四川總督崇實參奏奉 旨驅逐回籍後仍在四川自刻關防徵調鄉勇收召匪目陳八仙等聚眾橫行經該撫宣言驅逐該編修造詞羅織等語蔡壽祺所參薛煥行賄一節業經華豐等訊無實據先行奏結並將蔡壽祺交部議處其劉蓉善

於黃緣一節先經華豐等訊取蔡壽祺供詞亦稱得之風聞並無實據今據劉蓉遵旨明白回奏各情與蔡壽祺並無實據之供相合蔡壽祺業因奏參薛煥不實經吏部議以降二級調用不准抵銷所有蔡壽祺奏參劉蓉不實之處著從寬免其再行置議惟劉蓉片內所稱蔡壽祺在四川私刻關防調勇招匪挾嫌構陷各情仍著交原派查辦此案之肅親王華豐等傳到蔡壽祺研訊具奏至朝廷聽言必期詳審劉蓉薛煥既被指參豈能不加訊問轉致大臣名節無由其白今劉蓉摺內有請放歸田里等語詞氣失平殊屬非是總之黜陟進退朝廷自有權衡非臣下所能自便劉蓉所請著毋庸議○諭前據喬松年奏鳳陽紳民稟請在臨淮地方建立已故漕運總督袁甲三專祠當經降旨允准嗣因曾國藩喬松年覆查孫家泰蒙時中等解赴臨淮死難情形係張學醇奉袁

甲三檄提致墮苗逆詭謀該故漕督未能覺察辦理不善復經降旨撤去臨淮專祠茲據曾國藩奏據鳳陽府屬各紳民稟稱袁甲三清廉勤苦有拊循保障之功辦理壽州紳練誠有不善而一眚不掩終身懇恩仍中前旨免其撤銷等語朝廷賞罰予奪悉視其人之功過爲權衡毫無成見旣據曾國藩奏該紳民等合詞籲請是袁甲三駐軍臨淮維持大局尙有遺愛在民不無微勞足錄所有已故漕運總督袁甲三臨淮專祠著加恩免其撤銷以順輿情○諭軍機大臣等劉長佑奏匪蹤回竄東境見籌防剿情形一摺賊蹤飄忽異常奔竄靡定見已由開河等處向西南逃去則入直入豫皆可伺隙奔突劉長佑見赴大名等處相機防剿卽著妥籌布置毋令賊匪得由曹單一帶旁趨擾及直境吳昌壽亦當派撥兵勇在東豫交界處所實力扼截毋稍疏懈黃河關繫緊要劉長

佑已飭大名鎮道加意設防並派撥兵練巡防北岸布置尙爲周密而山東所轄河道較長濮范一帶伏莽未盡尤應嚴密防範著閻敬銘調派兵團駐紮東省北岸以杜偷越而免勾結豫省沿河地方吳昌壽會同張之萬認真防堵並飭河北鎮道與大名防軍聯絡聲勢以期周密格林沁前已追賊至紅花埠一帶此時賊蹤回竄東境勢漸北趨僧格林沁當懷遵前旨督帶兵勇繞由北路偏賊向南庶可與清淮等軍兩面夾擊將此賊聚而殲旃毋令往來竄擾疲我兵力丁寶楨等軍已繞赴東平正可就近擊賊著閻敬銘嚴飭該藩司等會同陳國瑞之軍跟蹤追剿毋誤戎機其威縣等處防務劉長佑仍當飭令李鶴年等盡力籌辦不可稍涉大意至山西地界多與直豫接壤亦應先事籌防著沈桂芬勤加偵探扼要防堵以保完善將此由六百里各諭令知之○諭曾國

藩奏遵派援軍先後到防一摺吳毓芬張樹珊等軍經李鴻章吳棠等先後入奏業已陸續到防見在東南援軍四集兵力已厚西北一帶兵勢單弱賊匪屢犯東境密邇直疆非有知兵大臣前往剿辦不足以殄賊氣而靖寇氛本日據劉長佑奏賊由東平濟甯折竄西南大名開長防務均形喫重更須亟集援軍以防賊匪奔突著曾國藩檄令劉銘傳懷遵前旨酌帶所部數千名北行毋稍延緩賊既由東平濟甯折竄西南有渡黃上竄直隸之勢江南水陸援軍俱落賊後黃翼升歐陽利見水師及彭玉麟等師船曾否溯流上駛如吳棠前奏駐紮濟甯一帶扼之黃運兩河之交著吳棠彭玉麟斟酌情形相機迅速調撥不可再行遲延落後前因甘肅回氛甚熾金國琛劉松山均係甘省實任人員是以催令各赴本任見在閩省汪李兩逆悍黨尙多設回竄江境皖南徽甯兩處

之防關繫綦要肅州鎮旣已簡放有人金國琛一員卽著暫緩赴甘俟閩省軍務底定皖防稍鬆仍卽飭赴本任以專責成將此由六百里各諭令知之○戊子諭軍機大臣等閻敬銘奏捻匪渡運西竄逼近黃河情形並帶勇出省一摺此時逆蹤逼近黃河南岸難保不勾結水套匪徒希圖北渡亟應嚴行堵禦閻敬銘已出省馳赴河北東昌茌平一帶卽著督飭派出各軍實力嚴防遇賊卽擊不得稍有疏虞致令匪蹤北渡劉長佑見赴大名等處著懍遵昨日諭旨相機防剿毋令竄入直境僧格林沁全軍業已行抵鄆城著卽繞由北路迎頭截擊倘賊南趨庶可與清淮等軍兩面夾攻以收聚殲之效昨諭吳棠等將黃翼升歐陽利見水師及彭玉麟等師船相機調赴上游著吳棠懍遵前旨會商彭玉麟星速調撥上駛於直東兩省扼要駐紮以遏逆氛劉銘傳並懍遵前旨星

速馳赴直境毋再遷延將此由六百里諭知僧格林沁劉長佑吳棠閻敬銘並傳諭劉銘傳知之○己丑賜崇綺等二百六十五人進士及第出身有差○諭內閣前因御史劉慶奏參鄭親王承志狎優比匪各情當交宗人府刑部提犯審訊該衙門等訊明大概情形請令該御史指實覆奏旋據劉慶覆奏承志不自檢束之處係屬得自風聞復經降旨令宗人府會同刑部按照所奏各情再行提犯研訊茲據奏稱會同審明承志被參各款並究出奉恩將軍有說事得賊等情請分別定擬等語此案劉興義卽劉義興因伊祖曾充已革鄭親王府莊頭聞承志襲爵起意來京營謀進府當差託素識陳二卽馬冀陳代求世襲奉恩將軍崇芳引薦並求頂帶崇芳輒令劉義興孝敬鄭親王車廐銀兩並未經收受崇芳得謝禮京錢二百弔實屬不合崇芳著革去奉恩將軍照例折圈

禁半年園滿後折罰養贍錢糧六箇月三等護衛常英門千總金廣元雖無與鄭親王聚會演唱情事惟身任職官輒演唱票戲究屬有玷官箴均已革職所得杖罪免其發落鄭親王承志於崇芳代劉義興屢次央求賞給頂帶差使情願送給車馬該親王雖未收受亦無賞給頂帶之事惟當崇芳賄說之時含糊回答並不正言拒絕實屬不合承志著交宗人府議處鄭親王濟爾哈朗功在社稷承志由旁支特揀襲封親王自應兢兢業業勉紹箕裘若稍不自檢卽難免被人指摘此次雖查無確據該親王仍當力圖滿濯用繼前徽毋替先烈懷之勉之○諭軍機大臣等都察院奏廣東舉人馮典夔等遣抱告以客匪焚掠懇請妥爲安插等詞赴該衙門呈訴據稱客匪馬從龍等倡亂前後殺土民十餘萬該匪退守五阮老巢時勢頗窮蹙而卓興意存袒護並不認真辦理迨客

匪假意投誠卓興輒捏稱恩平縣之那扶金雞水等處與土鄉隔絕稟請安插帶領該匪在恩平縣占踞田莊殺斃土人商民數百名搶奪貨物焚毀貨船數百隻將那扶金雞水土著村莊百餘焚毀殆盡殺戮開平新甯土人擄掠婦女不可勝計等語所控各情與毛鴻賓郭嵩燾前奏安插客民爲土人擄殺數百之語又屬兩歧土客仇讐已深處置稍不得宜必將報復相尋釀成巨禍該客民等如果焚毀村莊肆行殺戮是就撫竟屬空言而土民又豈肯相安無事卓興辦理此事是否意存偏袒庇匪虐民其客民安肆焚殺是否確實著瑞麟郭嵩燾督同臬司秉公查辦並將安插客民妥議章程毋致再生枝節其該舉人等呈請改擇別處曠土遠地分黨安爲安插之處著斟酌妥籌辦法毋得固執一偏之見原摺呈均著鈔給閱看將此由四百里諭令知之○閩浙總督左宗

棠奏遵查杭嘉湖漕額甚重請按科則重輕統減三分之一下部
議尋議原減數目過多擬請於三十分中減去八分從之○于福
建陣亡遊擊鍾元興參將文任重祭葬世職○庚寅左宗棠徐宗
幹奏劉典等軍由龍巖進剿奎洋獲勝後汪逆海洋仍率死黨屯
踞龍巖南靖永定交界之金豐苦竹梅林山城場校上下奎洋一
帶三月二十日康國器馳抵龍巖撫溪親督知府康熊飛等分路
前進行至東安遇賊急擊擒斬共七十餘名茅畚踞逆傾巢來援
康熊飛等更番疊戰吳光亮詹惠從小路鈔出攻破山腰賊壘康
熊飛等乘勢急進賊悉棄壘狂竄立將茅畚賊壘三座踏毀適官
軍進逼漳州侍逆將上下奎洋各處山徑悉行掘塞僅畱由南靖
赴漳郡一路十四日劉典率副將張福齊等分路進剿該逆傾巢
出拒張恆祥張福齊親督各營衝殺攻破賊卡兩處見嶺巔尙有

二壘守賊約四五千人參將李大有等率隊猱援而上賊勢不支殺斃及墜崖死者無算立將下奎洋賊壘五座賊館五十餘處賊卡十餘處一律平毀殺賊二千餘名中奎洋踞逆來援劉典飭參將陳集賢等由下奎洋轉戰而來與劉大謨等三路進攻將賊擊敗乘勝追殺數百名餘賊逃入對岸壘中官軍偏攻正急汪逆由梅林場校突出劉典督勇猛戰十餘合將賊擊退上奎洋來援之賊亦爲楊芳桂所敗計其斃賊二千餘名陣斬僞天將翟玉山陳洗明及曾姓等賊目數十名生擒老賊七十餘名其康國器一軍進勦苦竹與賊遇於磔下該逆不意官軍驟至退入卡中吳光亮等併力圍攻立將磔下賊壘焚毀三路躡追適苦竹之賊率股前來吳光亮等奮勇衝殺斬賊數百名賊卽敗走官軍追至苦竹羣賊退入山頂壘中吳光亮等乘勢急攻山頂各逆不出康熊飛等

行至太坪遙見場校梅林援賊翻山竄至卽飭羅洪彪等分路埋伏自率輕騎挑之賊入伏中兩路突起奮擊斃賊三百餘名賊眾大潰後股援賊亦經官軍挫斬多名劉清亮王德榜兩軍過河築壘復將河邊悍賊殲斃無數查侍逆經官軍屢次痛剿其伺隙狂竄固在意中漳州東北及正北一帶兵力尙單臣宗棠以西路龍巖永定一帶屢獲勝仗汪逆勢難由此北竄見飭總兵劉明燈等五營取道省城由興泉口赴安溪邊界相機進剿臣宗棠卽帶親兵馳赴前途就近督辦其郭松林楊鼎勳所部本擬進攻漳浦因賊勢趨重漳州郭松林一軍抵廈門後分紮海澄鎮門與高連陞各營聯絡未便遽行他調見在楊鼎勳一軍亦至廈門而漳浦之賊又多折回漳郡蘇軍暫由漳南攻剿可斷漳州漳浦踞賊往來於局勢深有裨益 上諭軍機大臣等逆首汪海洋盤踞龍巖南

靖永定交界之金豐等處經官軍分路進攻賊勢漸形窮蹙左宗棠以漳城東北一帶兵力尙單添調總兵劉明燈等五營由興泉赴安溪邊界進剿該督亦帶親兵由省城取道趨赴前途督辦著卽親督各營將士將漳郡踞賊實力掃蕩毋稍鬆勁郭松林楊鼎勳等軍分紮海澄鎮門及廈門等處與高連陞等各營聯絡聲勢當可斷賊竄入海道之路惟賊情詭譎異常左宗棠須嚴檄郭松林加意巡防不可稍涉大意漳浦之賊旣多轉入漳郡正可令郭松林等分兵乘虛襲取漳浦以清漳郡南路此股逆匪俱係積年悍賊乘隙紛竄是其慣技左宗棠務當分兵布置四面圍剿將漳郡之賊就地殲盡毋令逸出鄰境致垂盡餘匪又成燎原之勢漳州西路官軍雖屢獲勝仗而地廣兵單深虞旁竄左宗棠前擬檄調江西之軍就近援剿未知曾否到防見在金豐及上中奎洋賊

巢尚未盡掃苦竹山頂尙爲賊踞卽著左宗棠檄飭各軍乘勝攻拔並著瑞麟郭嵩燾飭令李福泰方耀統帶所部會合閩省西路各軍先將雲霄平和詔安等處攻克以斷漳賊西竄之路俾李汪等逆可就漳郡聚殲方爲妥善婁雲慶一軍見駐武平兵力較厚著孫長紱仍遵前旨檄飭進赴粵境瑞麟郭嵩燾迎提調撥以固邊防汪逆屢有竄江之意孫長紱務當嚴密布置毋令竄入本境將此由六百里諭知瑞麟左宗棠徐宗幹郭嵩燾並傳諭孫長紱知之○諭李瀚章奏通籌防剿大概情形並霆營散眾行至咸甯滋擾張凱嵩奏梧州官軍疊破賊巢各摺片鮑超所部霆營勇眾前據官文奏潰勇行至咸甯逆謀始露等語當經諭令官文李瀚章等派兵截遏茲據李瀚章奏稱霆營前收降眾復叛在湖北咸甯縣地方劫掠勢甚猖獗是此起潰卒已有聚而難散之勢亟應

乘其初起迅速撲滅官文前派追截之兵是否足敷分布著嚴飭派出將弁認真妥辦將爲首逆犯擒治設法分散其黨以免蔓延岳州地控南北李瀚章已飭趙煥聯帶勇一千餘名馳赴岳州駐紮卽著督飭該臬司會同劉國斌等水師分巡控扼毋稍疏虞仍察看緩急隨時增兵助守藉壯聲威藤縣霍十八等起旗嘯聚以岑溪之曇容南渡爲總巢經道員蔣澤春吳光春等督軍進剿疊破賊巢辦理甚屬出力著張凱嵩飭令蔣澤春等嚴督弁勇躡捕霍十八務獲並將白良蛟灣踞逆剋日殄除以清餘孽至髮逆盤踞黔邊勾結苗逆互爲聲援久爲粵黔湘三省之患見在首民陳輝夏等雖經薙髮繳械悔罪投誠第收降最多流弊著勞崇光張亮基張凱嵩妥爲籌辦不得敷衍目前致貽後患逆首李七遁歸黔匪何二股內賊目胡性聰亦竄入下江黔匪羅洪處並著勞崇

光張亮基張凱嵩督飭黔粵各軍躡緝務獲以淨根株湖南東西兩路防剿事宜卽著照李瀚章所籌辦理該撫其實力實心嚴密妥籌以副委任將此由五百里各諭令知之○追予故副都統銜署烏魯木齊都統保恆祭葬卹廕如軍營病故例○辛卯諭軍機大臣等閻敬銘奏續探賊匪游弋黃河南岸分兵籌防暨密陳賊酋兇狡情形各摺片賊匪在范縣東南連破民寨賊馬已竄至荷澤之甘露集奔突無定散布於荷鄆范濮之間界近開州閻敬銘已調齊水陸兵勇及聊城陽穀朝城范縣等處民團在黃河北岸聯絡布置著卽嚴飭派出各員弁嚴密堵禦遇賊卽擊毋稍疏懈定安已率同章應麒移赴開濮交界著卽咨令該副都統會同直省防軍扼要遏擊黃河水套伏莽尙多設被賊匪勾結渡河所患尤巨並著檄飭該處防兵隨時防維毋得稍涉大意賊匪爲價格

林沁大軍所偏。又有陳國瑞分兵鈔截。故往往避兵而行。紛紛肆竄。著僧格林沁仍遵前旨。繞由北路截擊。務須穩慎進取。不可銳意輕進。賊自河南確山竄至東境。東趨滕嶧。南竄海贛。又復折回。蔓延於范濮曹單一帶。急則晝夜狂奔。緩則數日屯踞。賊中髮捻各酋皆著名悍寇。又兇狡善戰。往往以一騎夾一步爲團陣。滾進絕非從前捻匪志在剽掠者可比。其素所畏憚者。惟僧格林沁。故專意欲老其師。以逞其詭計。該親王轉戰數省。追奔逐北。使賊不暇喙息。而逆蹤飄忽。靡常轉瞬千里。是專恃僧格林沁跟蹤追躡。尙恐徒疲兵力。亟宜增添勁旅。專派知兵大臣統率諸軍分兩路輪替兜剿。以期殄滅無遺。楚軍素稱能戰。惟曾國藩聲威素著。可以惟所指揮。前已有旨令曾國藩酌度出省。此時軍情更緊。燎原之勢已成。設再任其長驅奔突。有後追之兵而無前截之兵。此防

彼竄累日經年數省膏腴悉供接括於中原大局所關非細曾國藩老於戎事籌畫動中機宜前次奏稱分布各軍專顧東西兩防各專責成期與北路僧格林沁共收夾擊之效可知該大臣於籌辦此股賊匪亦已胸有成竹與諭旨亦相脗合著卽剋期出省督率南路水陸援軍偵探賊蹤相機剿辦其江南北應調何軍出省後應駐何處督師均著該大臣斟酌妥辦僧格林沁轉戰數年勤勞備至南路既有曾國藩大枝勁旅卽著繞赴北面屏蔽畿輔添調馬隊養足威望與曾國藩會合夾擊務須加意持重斷不可輕進失利直隸防兵仍單疊經諭令劉銘傳統帶精兵數千迅赴直隸與劉長佑商辦防剿該提督統兵自南而北正可與賊相遇卽可痛加剿洗與僧格林沁之軍兩面夾擊並著懷遵疊次諭旨星夜起程北上毋再遲延劉銘傳北來後所部兵勇尙多著曾國藩

遴派得力將弁妥爲管帶酌量調遣以期得力僧格林沁曾國藩均係公忠體國爲朝廷倚重之臣諒必能和衷共濟力持全局也將此由六百里諭知僧格林沁曾國藩閻敬銘並傳諭劉銘傳知之○諭孫長紱奏赴甘肅營勇眾叛逃派兵扼要堵截一摺前據官文奏霆營勇眾潰散行至咸甯逆謀始露當經諭令湖廣江西各省督撫派兵堵截茲據孫長紱奏已派總兵萬泰普從忠等各帶兵勇先赴義甯武甯扼守並檄記名提督孫昌國率領廠船巡防義武河面又於鄱湖贛河分路布置截其竄閩之路所籌尙屬周妥第此起叛勇其中降眾甚多久經戰陣見旣叛迹昭彰勢必鋌而走險武義偏近興國通山難保不乘虛竄突朝發夕至孫長紱派出各軍務當檄令飛速到防遇賊卽擊不得稍涉稽延致落後著至援閩霆字各營尤應防其煽惑著左宗棠等飭令婁雲慶

妥爲拊循駕馭鎮定軍心毋令生事閩省賊氛經各路官軍痛加剿洗長圍之勢漸成左宗棠等務當嚴檄各軍合力兜剿毋令回竄鄰疆致成延蔓江省地方緊要此時叛勇近在楚疆籌防尤急沈葆楨撫江數載素得兵民之心自應迅速回江籌辦防剿事宜以副眾望著左宗棠徐宗幹傳知沈葆楨毋庸俟百日假滿卽行前赴江省視事該撫平日公忠體國想必不瀆詞陳請也將此由六百里諭知左宗棠徐宗幹並傳諭孫長紱知之○諭崇實駱秉章奏屯弁聚眾滋事當卽撲滅全屯底定各摺片理番廳屬下孟屯增設守備穆租索朗及其子穆裕寬潛蓄逆謀剋扣屯餉遂脅屯兵謀叛濫斃多命復擅調屯兵盤踞廳城擁眾抗拒實屬罪大惡極經署同知吳夔梅等調集屯兵團勇將首逆穆租索朗及其子穆裕寬擒斬正法殲除黨與五屯一律安靖辦理尙爲妥速仍

著崇實駱秉章飭令理番文武各員將應辦善後事宜妥爲籌辦務期永杜爭端以弭後患據該督奏稱假期已滿目病尙未痊愈見值邊防喫緊力疾視事等語具見矢志公忠以國事爲已任所有軍務重事卽著由該督妥爲籌辦其日行事件仍委藩司代拆代行一面趕緊調治就痊以慰廬繫前因官文奏稱霆營勇眾行至湖北金口地方潰散竄往咸甯當經諭令駱秉章傳知鮑超趕緊取道湖北招集散勇統帶赴閩剿賊以贖前愆無庸出關剿賊近日疊據李瀚章孫長紱奏報霆營降眾復叛在湖北咸甯地方劫掠勢已猖獗驛路梗阻該叛勇聲稱赴江索餉實欲赴閩投賊並欲勾結援閩霆軍等情是該叛勇逆迹業已昭彰亟應趕緊籌辦此股叛黨係屬鮑超舊部輒敢乘機煽亂該提督雖已先行回川究不能辭其責湖北湖南江西等省前派成大吉等軍雖經分

路扼截難保不恃眾抗拒乘機竄突鮑超統領霆營素爲勇丁所信服呼應較靈必得該提督親往咸甯等處曉以大義怵以利害冀可聞風反正消患甫萌卽著駱秉章傳知鮑超懷遵前旨迅速馳赴湖北一帶會同成大吉等軍扼截叛勇協力兜拏其自拔來歸真心向順者卽著分別招集與前次投回勇丁或酌畱管帶赴閩或賞遣回籍均由鮑超相機妥辦鮑超俟辦理叛勇事竣卽著督軍入閩毋稍延緩婁雲慶等軍由武平赴粵援應並著該提督飛速知照婁雲慶嚴密防範毋令所帶勇丁爲叛勇煽惑勾結以杜亂萌鮑超受恩深重必當仰體此意剋日赴鄂無誤事機也將此由六百里諭知崇實駱秉章並傳諭鮑超知之○諭恩麟陶茂林奏移營追剿賊匪疊獲大勝克復鹽茶廳各摺片並階州剿匪確情禁營形勢繪圖呈覽一摺恩麟所奏陶茂林一軍暫駐中灘

將撲營之賊擊退並將王家集賊巢攻克其圍攻陶世貴等營之賊亦經官兵兩次擊退並經陶茂林督兵進攻將羊營寨張家營齊家營三巢平毀剿辦尙屬得手狄河並撒拉各匪勾通洮岷各路夥黨潛謀竄陷鞏昌且狄河大股逆匪傾巢而出省城卽不免動搖所有省城防守事宜恩麟自當嚴密布置豫籌防範惟肅甘兩郡及嘉峪關西甯等處一片賊氛若不早除恐勢成燎原將來益難收拾前經諭令雷正綰酌撥數營進紮會甯以便替出陶茂林之軍前赴肅甘進剿著雷正綰仍遵前旨辦理陶茂林俟雷正綰所撥兵勇到齊後卽統率所部由狄河一帶以次進剿前赴肅甘至西甯一帶情形近日未據玉通奏報仍著恩麟探明隨時具奏並著分派兵勇前往援應不得專顧蘭州置省外州縣於不問鹽茶廳回匪經曹克忠剿敗竄遁都興阿穆圖善當飭令該總兵

迅速進拔靈州以期合兵剿平甯夏毋稍遲延至恩麟所奏階州
進剿髮匪尙係正月以前情形前據駱秉章奏陳自正月至三月
間攻戰軍情賊勢漸蹙舊城山壘賊眾出降教場壩賊壘已經攻
拔惟隴家壩以南尙有賊壘三座城南尙有賊匪礮臺若不先行
攻克則官軍爲所牽掣勢難嚴密合圍其舊城壩賊壘六座是否
悉數剷除並著恩麟查明具奏階州城池究竟何時可克並著駱
秉章劉蓉恩麟檄飭在事諸軍實力圍攻剷期蕝事不准再涉遷
延致滋貽誤將此由六百里諭知都興阿穆圖善雷正綰駱秉章
劉蓉並傳諭恩麟陶茂林知之○壬辰諭內閣管理戶部三庫事
務周祖培等奏八旗承領兵餉等款請申明舊例嚴定章程一摺
前據鑲黃旗滿洲以該旗承領米折銀兩內有低潮虧短奏請查
辦茲據奏稱該旗解回抵潮元寶四錠令匠人當堂燒鍊委係高

銀仍如原數當經該旗章京領回內二錠旁翅係該旗自行鎔化致虧銀十五兩三錢卽按奏定章程辦理至該旗所稱實虧銀一百一兩零查各項銀兩承領時均係督率司員眼同該章京逐平彈兌各旗法碼亦與部庫較對相符不至虧短請飭該旗自行查辦等語著照所議辦理此次該旗自行鎔化虧欠銀兩業經照章補足若不嚴定章程各該旗難保不藉口庫虧暗圖侵蝕情事嗣後各該旗都統副都統每遇本固山應領餉銀等款日期酌定一員親身赴庫並帶同章京暨認識銀色人役會同管庫大臣等監放監領如該旗都統副都統是日不到卽將兵餉暫行停放俟各旗放竣再由銀庫定期補放其承領時如有短少照例由庫補足出具並無短少低潮甘結承領仍由該庫逐帶散給印花由承領官自行封口運回未領以前責成在庫既領之後責成在旗不准

互相推諉至各旗營領銀後如經看有成色應卽呈堂辦理不得自行鎔化以杜流弊經此次嚴定章程之後各該旗如有藉口庫虧暗中侵蝕等弊卽由該管大臣將承領章京並承辦人等嚴究參辦此旨著纂入則例永遠遵行○癸巳 上詣 大高殿祈雨

○國瑞奏四月二十六日據親王僧格林沁家人富克精阿等飛馳到濟泣訴二十四日該親王在曹州城西之高樓集地方追及賊蹤比時陳國瑞郭寶昌何建鰲等各帶步隊趕到該逆瞥見我軍卽列仗迎拒此次該逆自汶上縣之袁路口過河竄至鄆城西北水套一帶勾結鄆北伏莽聚集馬步數萬勢甚兇猛經僧格林沁督軍擊退復率馬步進追不期伏賊盡出我軍被賊圍裹該親王督令馬隊衝突斃賊甚夥始將敗殘馬步各隊帶紮荒莊復被該逆層層包裹僧格林沁於夜閒率領馬隊衝出賊圍該逆大股

追襲行至距曹州府西十餘里該親王力竭陣亡其翼長全順營
總何建鰲總兵陳國瑞郭寶昌等見據逃回官弁聲稱均受重傷
存亡莫保該家人等曾隨官兵搶出僧格林沁屍身乃因大股賊
匪壓至將屍身掩藏麥地得以馳來報信等語臣聞信之下痛不
欲生賊匪見在曹州鉅野一帶盤旋臣祇得暫紮濟甯收集兵勇
先行尋覓該親王屍身再圖滅此窮寇又翼長恩承向隨僧格林
沁追剿竄匪均係照料隊後一切軍務是日因見前路馬步紛紛
敗退隨即馳赴曹州嗣聞軍情賊勢萬難在曹停留是以攜帶欽
差關防到濟所稱打仗情形大略相同將關防敬謹封存臣幫辦
無能咎無可辭惟有請旨將臣先行治罪並請簡放欽差總統全
軍設法剿辦以挽大局 上諭內閣國瑞奏官軍進剿髮捻督師
重臣遇伏力戰陣亡見籌剿辦一摺髮捻逆匪竄擾山東由汶上

縣之袁路口過河竄至鄆城西北水套一帶勾結伏莽糾約馬步數萬勢甚兇悍經僧格林沁督軍迎剿將賊擊退復督馬步進追猝墮賊伏該親王督率諸軍奮力衝突斃賊甚夥乃該逆恃眾層層包裹僧格林沁於四月二十四日夜間衝出又被該逆大股猛撲在曹州城西力竭陣亡覽奏曷勝悲悼欽差大臣科爾沁博多勒噶台親王僧格林沁於咸豐三年閒督師剿賊疊克臨清連鎮馮官屯高唐州等處北路賴以肅清嗣於十年閒整旅南征轉戰直隸山東河南安徽湖北等省掃蕩捻圩殄除髮匪擒斬巨逆張落刑苗沛霖等不可勝計軍麾所至眾望允孚朝廷以該親王頻年轉戰士卒疲勞申諭再三令其持重而該親王忠勇性成視國事如家事臨陣無不身冒鋒鏑誓滅此賊而後已方期天鑒忠忱克竟全功長承恩眷乃猝遇賊伏力竭陣亡覽其死事情形不禁

爲之隕涕僧格林沁著賞給陀羅經被照陣亡例以親王飾終典禮從優議卹應得卹典該衙門詳查具奏任內一切處分悉予開復准其入城治喪其靈柩回旗時著沿途地方官妥爲照料並派乾清門侍衛克興阿岳林恩全吉凌迅卽馳驛前往該營迎護賞給銀五千兩由廣儲司發給經理喪事准其入祀京師昭忠祠其死事地方及該親王出師省分均著建祠生前事功宣付國史館立傳伊子伯彥訥謨祜俟百日孝滿後卽著承襲親王該衙門無庸帶領引見伯彥訥謨祜所遺貝勒卽著賞給伊孫那爾蘇以示篤念忠盡之至意尋議上賜祭葬諡曰忠○諭朕奉 慈安皇太后 慈禧皇太后懿旨科爾沁博多勒噶台親王僧格林沁蒙宣宗成皇帝恩眷之隆派充御前大臣管理旗營事務 文宗顯皇帝御極以來優加委任咸豐三年 特命剿辦髮捻十年督師

南下轉戰直隸山東安徽河南湖北等省於今六載親歷戎行靡
閒寒暑屢殲巨憝懋建殊勳功在生民志安社稷頃因督戰陣亡
雖已加恩優卹建祠尙不足以崇獎忠藎國家定制王大臣中有
公忠體國超眾宣勞者尙有配饗之例況僧格林沁爲國宣力忠
勇性成尤宜特沛殊恩用慰忠魂而昭異數僧格林沁著加恩配
饗 太廟以示朝廷軫念勳舊有加無已之意○諭軍機大臣等
國瑞奏官軍接仗失利親王僧格林沁力戰陣亡見在收集兵勇
勦辦一摺此股賊匪雖係窮寇內有牛老洪張總愚陳大濬宋憬
詩賴汶沆等皆著名賊首兇狡異常此次自汶上縣袁路口過河
竄至鄆城西北水套一帶勾結鄆北伏莽聚集馬步數萬僧格林
沁督軍擊退乘勝跟追不期伏賊盡出層層圍裹該親王力竭陣
亡覽奏曷勝震悼該親王數年以來屏蔽北路屢滅巨股賊匪惟

以忠勇性成有進無退朝廷申諭再三令其持重亦不料其遽至
於此前經諭令曾國藩酌度出省督師剿賊見在事機愈迫著卽
攜帶欽差大臣關防統領所部各軍星夜出省前赴山東於北面
擇要駐紮督剿劉銘傳疊經有旨令其帶勁旅數千名北進諒已
起程著卽繞赴北面駐紮與劉長佑會商堵剿之策不准稍涉遷
延致干重咎逆氛如此猖獗必圖北犯大名等處防務十分喫緊
深恐兵力單薄劉長佑當通籌調派分道扼防毋令一賊闌入直
境開州等處有黃河可扼著督飭防兵民團晝夜巡防毋令偷渡
閻敬銘見駐東昌在平一帶務當督率兵勇整頓團練力遏寇氛
毋令北竄如兵力不敷著於各標內抽調丁寶楨是否仍在濟甯
一路著閻敬銘飭令該藩司認真防範扼要駐守如再不得力必
當重治其罪直東伏莽甚多恐聞此信盜賊蜂起劉長佑閻敬銘

當責成各路地方文武員弁悉心防範以期消患未萌詹啟綸一軍見在何處著喬松年間敬銘等催令北來牽制賊股使不得銳意北犯安徽河南與賊氛逼近喬松年當督飭英翰朱淮森等固守宿州臨淮等境富明阿前有旨令其緩程行走見在計已行抵直隸接旨後卽著畱於直隸與劉長佑籌辦堵剿吳昌壽著卽帶兵出省駐紮直東交界會合直隸山東各軍分投夾擊殄滅巨股其河北一帶並著嚴飭該鎮道等整頓團練賊來卽擊毋稍鬆懈清淮距賊不遠吳棠久在該處深得民心頗著成效將來曾國藩督師北上糧臺當設於徐州清淮爲該大臣後路著吳棠認真整頓兵勇籌畫餉糈以備徵調水師輕利礮船吳棠曾否酌撥若干赴上游之濟甯運河及黃河一帶著卽迅速籌辦兩江總督已有旨令李鴻章暫行署理卽著前赴金陵接印任事兩江任大責重

李鴻章務須悉心經理仍隨時與曾國藩籌商曾國藩軍營調兵集餉各事宜該撫並當籌畫不得稍有遲誤曾國藩於接奉此旨後卽著先就見有兵力帶領出省北上其餘各路得力兵勇將弁不妨陸續檄調未可久待徵兵致勞廛盼總督印信暫交藩司萬啟琛收存毋庸俟李鴻章到金陵交卸該大臣公忠體國久著勤勤必能趕緊赴援盡掃寇氛綏靖北路曾國荃諒已就痊該大臣仍當勛以大義令其來京陛見候旨錄用或酌量招集舊部徑赴軍營隨同帶兵剿賊並著速行宣諭以收指臂之效僧格林沁所部蒙古官兵國瑞當與之熟習前次賞銀一萬兩尙存糧臺著先行散放仍宣示朝廷德意隨時妥爲拊循其受傷者宜令靜養不必再行出仗蒙古馬隊跟隨僧格林沁多年素知大義此次僧格林沁陣亡該蒙兵等自必倍加憤恨力圖復仇著國瑞將此旨摘

錄繙成蒙古文義徧行宣示欽差大臣關防著國瑞暫行護理濟甯一路關繫緊要務當收集各營兵勇親加訓練勉圖自振國瑞於主將損失未能督兵救援厥咎甚重此次僅予薄懲已屬法外施仁若再不知愧奮自問當得何罪全順何建鼇陳國瑞郭寶昌等下落並著確切查明具奏成保見在何處及此次不能力救主將之各官弁著國瑞一併據實嚴參毋稍瞻徇本日派乾清門侍衛克興阿岳林恩全吉凌前赴軍營迎護僧格林沁靈柩回旗並令偵探軍情俟到營時國瑞與之妥商辦理准其會銜奏事近日軍情賊勢著卽隨時奏報以慰馳繫僧格林沁遺骸爲該家人等搶出掩藏麥地著國瑞閭敬銘密派幹員率同該家人等前往尋覓妥爲棺斂務使忠骨得以早日歸葬是爲至要本日又諭令阜保特普欽各選調精壯馬隊五百名馳赴直隸著國瑞劉長佑酌

量調遣將此由六百里加緊又緊諭知曾國藩國瑞富明阿劉長佑吳棠李鴻章閻敬銘喬松年吳昌壽並傳諭劉銘傳知之○諭直隸邊境多與東省毗連防剿尤爲緊要劉長佑見在大名一帶駐紮兵力恐形單薄著崇厚迅速統帶洋槍隊一千五百名配齊軍裝器械卽日赴畿南一帶防剿其應在何處扼要駐守著與劉長佑體察情形會商籌辦不准稍有延誤天津防務亦關緊要應如何豫行籌畫之處著崇厚安速布置將此由六百里各諭令知之○諭鄭敦謹奏戴村壩工被匪拆毀請暫緩興修一摺山東東平州戴村爲運道全河關鍵該處玲瓏石壩及三合土壩均多損缺有礙運行經前署河督譚廷襄等委員勘估興修本年三月間賊匪突竄戴村將三合土壩等處作就外築圈壩全行決毀料物亦均被焚掠見值夏令雨水較多一時自難購料修築惟本年試

行河運伊始亟須妥籌興辦以利舟行著張之萬督飭坐補運河道敬和及廳州各員將戴村玲瓏石壩等處損缺各工迅速購覓工料及時修築儻藉口被賊拆毀任意稽延致誤糧艘轉運卽著張之萬指名嚴參將此諭令知之○命欽差大臣協辦大學士兩江總督曾國藩赴山東督師剿賊以李鴻章暫署兩江總督劉卨膏暫護江蘇巡撫由布政使護理○以主將戰歿未能救援革將軍國瑞內閣學士恩承職仍戴罪效力山東巡撫閻敬銘布政使丁寶楨均下部嚴議○甲午諭軍機大臣等劉長佑奏賊蹤竄徧黃河南岸邊防緊要見在遏擊籌辦情形一摺此股逆匪東奔西突剽悍異常直隸地勢平衍防兵單薄深恐難遏奔衝劉長佑當懷遵前諭督飭在防員弁及水陸各軍聯絡聲援實力防剿徐廷楨備調標兵五百名著飭令卽速赴防以實腹地此外如有可調之兵並

著劉長佑斟酌調派或添募精壯勇丁藉厚兵力總之賊匪早日殄滅即可省無數餉需不得以目前增餉爲艱因循貽誤洛河船隻甚多尤宜防其搶渡著仍飛咨吳昌壽飭將見泊船隻挽入上流劉長佑一面督飭兵團竭力守禦河岸毋稍疏懈東明孤懸黃河南岸閻敬銘當飭曹州鎮總兵等相機援應毋得稍分畛域賊匪趨向靡常山西之澤潞一帶與直隸河南境地毗連亟應豫籌防守著沈桂芬偵探賊情酌量調兵扼要嚴防以杜窺伺正在寄諭閒據閻敬銘奏重臣失利殉難賊趨郛城一帶見在趕緊回省布置省防各等語賊匪已趨張秋之南濟甯一帶尙有丁寶楨兵勇扼守難保該逆不乘閒直犯省城閻敬銘回省後務將省城守禦事宜嚴密布置該撫亦不宜久居省城何路軍情緊要卽親赴何路督剿其張秋至省一帶河岸尤須妥籌扼防毋令偷涉至

濰口河身由濟南一帶歸入黃河距省甚近該處爲鹽船聚集之處閻敬銘務當將此項船隻提赴下游毋令賊眾搶船北渡丁寶楨帶兵剿賊毫無成效著責令就見有兵力實力扼守濟甯相機進剿如再有疏失卽當從重治罪前經諭令吳棠酌調黃翼升等輕利礮船駛入山東運河及直隸黃河一帶助剿茲據閻敬銘奏東省兵勇無可再調若得江南礮船速至方能抽調各營相機戰守等語是師船防河實爲目前要務著劉長佑閻敬銘飛咨吳棠迅速辦理至礮船所泊地方必須近在湖河水勢深闊之處運掉方靈且有退步不至爲賊扼擄並著與吳棠酌量妥辦陳國瑞素稱勇悍若能招集潰勇歸閻敬銘調遣必可成軍雪恥著閻敬銘查明陳國瑞見在何處傳知該總兵將傷病趕緊調理一面收集所部速赴閻敬銘軍營隨同剿賊如賊勢北趨並令陳國瑞繞赴

北路迎頭截擊以遏狂氛景德一帶空虛劉長佑閻敬銘務當豫籌堵扼不可稍涉疏虞至親王僧格林沁殉難情形屍身曾否覓獲及全順等下落仍著閻敬銘詳查迅奏將此由六百里各諭令知之○諭見在督師重臣陣亡賊氛甚熾官軍失利之後勢難驟振本日據劉長佑奏賊眾屯聚濮范荷澤一帶窺伺黃河南岸意圖北渡等語直東地勢平行兵力未厚曾國藩距直東交界地方尙遠一切尙需布置調發恐未能一時遽到楊岳斌已由樊城起程前經諭令該督一入陝境卽行馳奏此時曾否入關尙未據該督奏到陝豫交界距直東交界地方甚近且所部兵勇業已成隊在途著卽先其所急移師東向星夜馳赴直東交界會同劉長佑閻敬銘聯絡聲勢力固畿疆門戶毋稍遲延觀望蔣凝學一軍前據吳昌壽奏已令赴甘歸楊岳斌調遣著將此軍一併帶赴直東

一帶以厚兵力儻楊岳斌已行抵西安一帶卽著暫行駐紮聽候諭旨遵行蒲州茅津渡及陝州沿河一帶均關緊要晉省兵力尤不足恃賊情飄忽異常設若闖入晉境大局所關非細楊岳斌如在陝省駐紮卽著派兵分紮各處與晉豫各省兵勇聯絡扼堵儻遇賊匪西竄無論秦晉卽可迎頭截擊以固兩省邊防將此由六百里加緊諭令知之○諭昨因直東防務喫緊諭令崇厚統帶洋槍隊一千五百名馳赴畿南與劉長佑會商防剿此起洋槍隊崇厚統帶起程外所有該處原練勇丁卽著崇厚飭令天津道李同文隨時認真操練務令技藝嫻熟其天津防務並著飭令該道員妥爲籌辦洋槍隊尙須添練卽著責成李同文於天津蘆臺兩鎮標內認真選擇添練以資防剿天津駐紮各國之領事官向與中國道員平行如海口通商事務有應咨行事件卽由李同文隨時

咨行其應行陳奏事宜卽由該道員呈明總理各國事務衙門轉行奏聞並著崇厚傳知該道員欽遵辦理將此由五百里諭令知之○諭瑞麟郭嵩燾奏官軍越境規取詔安獲勝見籌防剿情形並信宜肅清擒獲首逆各摺片福建賊匪自攻陷詔安逼近粵境經李福泰督率總兵黃朝恩等分路進剿追至詔安城下殺賊無數見在濂逆盤踞苦竹將陽等處並分黨進駐平和屬之巖溪直偏金豐鄉饒平大埔兩城勢均喫緊李福泰見擬分兵三路責成卓興翟國彥方耀各分一路防守柏嵩關楓朗老虎關等處布置尙爲周密卽著瑞麟郭嵩燾迅催卓興馳赴潮防與翟國彥方耀聯絡聲勢互相策應實力防剿毋稍疏懈粵省邊防旣固婁雲慶一軍卽可爲遊擊之師仍著催提前進視賊勢趨重何處卽飭迎頭截擊遏其西竄之路詔安雲霄平和等城均與粵省毗連瑞麟

郭嵩燾仍當督飭李福泰等酌度情形如兵力有餘卽行分軍越
剿相機規復不得徒以株守本境爲了事閩省各路防軍兵力尙
厚左宗棠前奏調派劉明燈等馳赴安溪該督帶親兵由省進剿
諒已星速前進卽著督飭諸軍實力痛剿迅殄逆氛惟該逆被官
軍兜圍勢必急思鋌走一經竄入他處又成不了之局正宜乘此
賊未竄動之際一面嚴飭各軍圍逼漳郡牽綴賊勢一面分兵先
將平和雲霄詔安等城設法規復翦其羽翼然後將漳州之賊合
力兜剿必可聚而殲旃均著左宗棠徐宗幹相機妥籌辦理信宜
一帶賊匪經副將會敏行等進剿先後斃匪數千並將首逆李河
孃等擒斬信宜境內肅清剿辦尙屬奮勉仍著瑞麟等飭令地方
文武按捕餘黨加意嚴防毋令西匪再行闖入見在西江旣已肅
清馮子材卽行馳赴廣西提督本任著瑞麟等傳知該提督馳抵

西省後將該省各股賊匪迅籌掃蕩用副委任將此由六百里各諭令知之○諭各路統兵大員直省督撫於軍營投效廢員嚴加釐剔○予福建殉難訓導楊晉熙祭葬世職○調吉林黑龍江馬隊五百名赴直隸軍營○是月豁免陝西華州等二十八州廳縣被擾積欠額賦蠲免浙江臨安等十一縣被擾本年暨來年額賦